

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं ॥

कृष्ण यजुर्वेदीय तैत्तिरीय संहिता पद पाठः (वाक्य सहित)

द्वितीयकाण्डे षष्ठः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in

Version Notes

1. This version, 0.1 dt 31st May 2020, is the current version.
2. This Version replaces earlier version 0.0 dated 30th June 2019.
3. Errors found and reported till 30th April 2020 have been incorporated.
4. We have modified conventions, styles etc wherever necessary.

Contents

2 कृष्ण यजुर्वेदीय तैत्तिरीय संहितायां पद पाठे

द्वितीयं काण्डं..... 4

2.6 द्वितीयकाण्डे षष्ठः प्रश्नः – अवशिष्टकर्माभिधानं..... 4

ओं नमः परमात्मने, श्री महागणपतये नमः, श्री गुरुभ्यो नमः

हरिःओं

2 कृष्ण यजुर्वेदीय तैत्तिरीय संहितायां

पद पाठे द्वितीयं काण्डं

2.6 द्वितीयकाण्डे षष्ठः प्रश्नः – अवशिष्टकर्माभिधानं

TS 2.6.1.1

स॒मि॒धो॑ य॒जति॑ व॒स॒न्तमे॒वर्तू॑नाम॒व रु॒न्धे॒ तनू॑नपा॒तं यँ॑जति॒ ग्री॒ष्ममे॒वाव॑
रु॒न्ध इ॒डो॑ य॒जति॑ व॒र्षा॑ ए॒वाव॑ रु॒न्धे॒ ब॒र्हि॒र्य॑जति॒ शर॑दमे॒वाव॑ रु॒न्धे
स्वा॒हाका॒रं यँ॑जति॒ हेम॑न्तमे॒वाव॑ रु॒न्धे॒ तस्मा॑त् स्वा॒हाकृ॑ता हेम॑न्
प॒शवो॑ऽव॒ सीद॑न्ति॒ स॒मि॒धो॑ य॒जत्यु॑ष॒स ए॒व दे॒वता॑नाम॒व रु॒न्धे
तनू॑नपा॒तं यँ॑जति॒ य॒ज्ञमे॒वाव॑ रु॒न्धे – [] 1

TS 2.6.1.1 - Padam

स॒मि॒ध इति॑ सं – इ॒धः । य॒जति॑ । व॒स॒न्तम् । ए॒व । ऋ॒तूना॑म् ।
अ॒वेति॑ । रु॒न्धे । तनू॑नपा॒तमि॒ति तनू॑ – नपा॒तम् । य॒जति॑ । ग्री॒ष्मम् ।
ए॒व । अ॒वेति॑ । रु॒न्धे । इ॒डः । य॒जति॑ । व॒र्षाः । ए॒व । अ॒वेति॑ ।

रुन्धे । बर्हिः । यजति । शरदम् । एव । अवेति ।

रुन्धे । स्वाहाकारमिति स्वाहा – कारम् । यजति । हेमन्तम् । एव ।

अवेति । रुन्धे । तस्मात् । स्वाहाकृता इति स्वाहा-कृताः । हेमन् ।

पशवः । अवेति । सीदन्ति । समिध इति सं – इधः । यजति ।

उषसः । एव । देवतानाम् । अवेति । रुन्धे । तनूनपातमिति

तनू – नपातम् । यजति । यज्ञम् । एव । अवेति । रुन्धे । 1 (50)

TS 2.6.1.2

इडो यजति पशूनेवाव रुन्धे बर्हिर्यजति प्रजामेवाव रुन्धे समानयत

उपभृतस्तेजो वा आज्यं प्रजा बर्हिः प्रजास्वेव तेजो दधाति

स्वाहाकारं यजति वाचमेवाव रुन्धे दश सं पद्यन्ते दशाक्षरा

विराडन्नं विराड्विराजै वान्नाद्यमव रुन्धे समिधो यजत्यस्मिन्नेव

लोके प्रतितिष्ठति तनूनपातं यजति – [] 2

TS 2.6.1.2 - Padam

इडः । यजति । पशून् । एव । अवेति । रुन्धे । बर्हिः । यजति ।

प्रजामिति प्र – जाम् । एव । अवेति । रुन्धे । समानयत इति

सं – आनयते । उपभृत इत्युप – भृतः । तेजः । वै । आज्यम् ।

प्र॒जा इति॑ प्र – जाः । ब॒र्हिः । प्र॒जास्वि॑ति प्र – जा॒सु । ए॒व ।
 तेजः॑ । द॒धा॒ति । स्वा॒हाका॒रमि॑ति स्वाहा-का॒रम् । य॒ज॒ति । वाच॑म् ।
 ए॒व । अवे॑ति । रु॒न्धे । द॒श । समि॑ति । प॒द्यन्ते॑ । द॒शाक्ष॑रेति
 द॒श – अ॒क्षरा॑ । वि॒राडि॑ति वि – राट् । अ॒न्नम् । वि॒राडि॑ति
 वि – राट् । वि॒राजे॑ति वि – राजा॑ । ए॒व । अ॒न्नाद्य॑मित्य॒न्न – अद्य॑म् ।
 अवे॑ति । रु॒न्धे । स॒मिध॑ इति॒ सं – इ॒धः । य॒ज॒ति । अ॒स्मिन् । ए॒व ।
 लो॒के । प्र॒तीति॑ । ति॒ष्ठति॑ । त॒नून॑पा॒तमि॑ति त॒नू – न॑पा॒तम् ।

य॒ज॒ति । 2 (50)

TS 2.6.1.3

य॒ज्ञ ए॒वान्तरि॑क्षे प्र॒ति ति॑ष्ठती॒डो य॑जति प॒शुष्वे॒व प्र॑तितिष्ठति
 ब॒र्हि॒र्य॑जति य ए॒व दे॒वया॑नाः प॒न्थान॑स्तेष्वे॒व प्र॑तितिष्ठति स्वाहाका॒रं
 य॑जति सु॒वर्ग॑ ए॒व लो॒के प्र॒ति ति॑ष्ठत्ये॒ताव॑न्तो वै दे॒वलो॒कास्तेष्वे॒व
 य॑थापूर्वं प्र॒तिति॑ष्ठति दे॒वासुरा॑ ए॒षु लो॒केष्व॑स्प॒र्धन्त॑ ते दे॒वाः
 प्र॒या॒जैरे॒भ्यो लो॒केभ्यो॑ ऽसुरा॒न् प्रा॑णुदन्त॒ तत् प्र॒या॒जानां॑ – [] 3

TS 2.6.1.3 - Padam

य॒ज्ञे । ए॒व । अ॒न्तरि॑क्षे । प्र॒तीति॑ । ति॒ष्ठति॑ । इ॒डः । य॒जति॑ । प॒शुषु॑ ।
 ए॒व । प्र॒तीति॑ । ति॒ष्ठति॑ । ब॒र्हिः । य॒जति॑ । ये । ए॒व । दे॒व॒या॒ना इति॑
 दे॒व – या॒नाः । प॒न्था॒नः । तेषु॑ । ए॒व । प्र॒तीति॑ । ति॒ष्ठति॑ ।
 स्वा॒हा॒का॒रमि॑ति स्वा॒हा – का॒रम् । य॒जति॑ । सु॒वर्ग॑ इति॑ सु॒वः – गे ।
 ए॒व । लो॒के । प्र॒तीति॑ । ति॒ष्ठति॑ । ए॒ता॒व॒न्तः । वै । दे॒व॒लो॒का इति॑
 दे॒व – लो॒काः । तेषु॑ । ए॒व । य॒था॒पूर्व॑मि॒ति यथा॑ – पूर्॒वम् । प्र॒तीति॑ ।
 ति॒ष्ठति॑ । दे॒वा॒सु॒रा इति॑ दे॒व–अ॒सु॒राः । ए॒षु । लो॒केषु॑ । अ॒स्प॒र्ध॒न्त ।
 ते । दे॒वाः । प्र॒या॒जैरि॑ति प्र॒या॒जैः । ए॒भ्यः । लो॒केभ्यः॑ । अ॒सु॒रान् ।
 प्रेति॑ । अ॒नु॒द॒न्त । तत् । प्र॒या॒जा॒नामि॑ति प्र – या॒जा॒नाम् । 3 (50)

TS 2.6.1.4

प्र॒या॒ज॒त्वं य॑स्यै॒वं वि॒दुषः॑ प्र॒या॒जा इ॒ज्यन्ते॑ प्रै॒भ्यो लो॒केभ्यो॑
 भ्रा॒तृ॒व्यान्नु॑द॒ते ऽभि॒क्रामं॑ जु॒होत्य॑भि॒जित्यै॑ यो वै प्र॒या॒जा॒नां मि॒थुनं॑
 वे॒द प्र॑ प्र॒जया॑ प॒शुभि॑ मि॒थुनै॑ जा॒यते॑ स॒मिधो॑ ब॒ह्वीरि॑व य॒जति॑
 त॒नू॒नपा॑त॒मेक॑मि॒व मि॒थुनं॑ तदि॒डो ब॒ह्वीरि॑व य॒जति॑ ब॒र्हिरे॑कमि॒व
 मि॒थुनं॑ तदे॒तद्वै प्र॒या॒जा॒नां मि॒थुनं॑ य॒ एवं वे॒द प्र – [] 4

TS 2.6.1.4 - Padam

प्र॒याज॑त्वमि॒ति प्र॒याज॑ – त्वम् । यस्य॑ । ए॒वम् । वि॒दुषः॑ । प्र॒याजा॑
इति॑ प्र॒याजाः॑ । इ॒ज्यन्ते॑ । प्रेति॑ । ए॒भ्यः । लो॒केभ्यः॑ । भ्रातृ॑व्यान् ।
नु॒दते॑ । अ॒भिक्राम॑मित्य॒भि – क्राम॑म् । जु॒होति॑ । अ॒भिजि॑त्या
इत्य॒भि – जि॒त्यै । यः । वै । प्र॒याजा॑नामि॒ति प्र – या॒जाना॑म् ।
मि॒थुन॑म् । वेद॑ । प्रेति॑ । प्र॒जयेति॑ प्र – जया॑ । प॒शुभि॑रिति॑
प॒शु – भिः । मि॒थुनैः । जा॒यते॑ । स॒मिध॑ इति॑ सं – इ॒धः । ब॒ह्वीः ।
इ॒व । य॒जति॑ । त॒नून॑पा॒तमि॒ति त॒नू – न॑पा॒तम् । ए॒कम् । इ॒व ।
मि॒थुन॑म् । तत् । इ॒डः । ब॒ह्वीः । इ॒व । य॒जति॑ । ब॒र्हिः । ए॒कम् ।
इ॒व । मि॒थुन॑म् । तत् । ए॒तत् । वै । प्र॒याजा॑नामि॒ति प्र – या॒जाना॑म् ।
मि॒थुन॑म् । यः । ए॒वम् । वेद॑ । प्रेति॑ । 4 (50)

TS 2.6.1.5

प्र॒जया॑ प॒शुभि॑ मि॒थुनै॑ र्जा॒यते॑ दे॒वानां॑ वा॒ अनि॑ष्टा दे॒वता॑
आ॒सन्न॑था॒सुरा॑ य॒ज्ञम॑जिघा॒स् सन् ते॑ दे॒वा गा॒यत्रीं॑ व्यौ॒हन्
पञ्चा॑क्ष॒राणि॑ प्रा॒चीना॑नि त्री॒णि प्र॒तीची॑नानि॒ ततो॑ वर्म॑ य॒ज्ञाया॑भव॒द्वर्म॑

यज॑मानाय॒ यत् प्र॑याजानूयाजा॒ इज्य॑न्ते॒ वर्मे॑व तद्य॒ज्ञाय॑ क्रिय॒ते
वर्म॑ यज॑मानाय॒ भ्रातृ॑व्याभिभू॒त्यै तस्मा॑द्-वरू॒थं पु॒रस्ता॑द्-वर्षी॑यः
पश्चा॑द्ध॒सीयो॑ दे॒वा वै पु॒रा रक्षो॑भ्य॒ – [] 5

TS 2.6.1.5 - Padam

प्र॒जये॑ति प्र – जया॑ । प॒शुभि॑रिति॒ प॒शु – भिः॑ । मि॒थुनैः॑ । जा॒यते॑ ।
दे॒वाना॑म् । वै । अ॒निष्टाः॑ । दे॒वताः॑ । आ॒सन् । अथ॑ । अ॒सुराः॑ ।
य॒ज्ञम् । अ॒जिघा॑ञ्सन् । ते । दे॒वाः । गा॒यत्री॑म् । वी॒ति । औ॒हन् ।
पञ्च॑ । अ॒क्षरा॑णि । प्रा॒चीना॑नि । त्री॑णि । प्र॒तीची॑नानि । ततः॑ ।
वर्म॑ । य॒ज्ञाय॑ । अ॒भवत् । वर्म॑ । यज॑मानाय । यत् ।
प्र॒याजा॑नूयाजा॒ इति॑ प्रयाज – अ॒नूया॑जाः । इज्य॑न्ते॒ । वर्म॑ । ए॒व ।
तत् । य॒ज्ञाय॑ । क्रि॒यते॑ । वर्म॑ । यज॑मानाय । भ्रातृ॑व्याभिभू॒त्या इति॑
भ्रातृ॑व्य – अ॒भिभू॒त्यै । तस्मा॑त् । वरू॒थम् । पु॒रस्ता॑त् । वर्षी॑यः ।
पश्चा॑त् । ह॒सीयः॑ । दे॒वाः । वै । पु॒रा ।
रक्षो॑भ्य॒ इति॑ रक्षः-भ्यः॒ । 5 (50)

TS 2.6.1.6

इति॑ स्वा॒हाका॒रेण॑ प्र॒याजे॑षु य॒ज्ञं स॒ं स्था॒प्यम॑पश्यन् तञ्
स्वा॒हाका॒रेण॑ प्र॒याजे॑षु स॒म स्था॒पय॑न् वि वा ए॒तद्-य॒ज्ञं छि॑न्दन्ति यत्
स्वा॒हाका॒रेण॑ प्र॒याजे॑षु स॒ं स्था॒पय॑न्ति प्र॒याजा॑निष्ट्वा ह॒वीं ष्य॑भि
घा॒रय॑ति य॒ज्ञस्य॑ स॒न्तत्या॑ अथो॑ ह॒विरे॒वाक॑रथो यथा॒पूर्वमु॑पैति पि॒ता
वै प्र॒याजाः प्र॒जाऽनू॒याजा॑ यत् प्र॒याजा॑निष्ट्वा ह॒वीं ष्य॑भिघा॒रय॑ति
पि॒तैव॑ तत् पु॒त्रेण॑ सा॒धारणं॑ – [] 6

TS 2.6.1.6 - Padam

इति॑ । स्वा॒हाका॒रेणेति॑ स्वाहा – का॒रेण॑ । प्र॒याजे॑ष्विति॑ प्र – या॒जेषु॑ ।
य॒ज्ञम् । स॒ं स्था॒प्यमिति॑ सं – स्था॒प्यम् । अ॒पश्य॑न् ।
तम् । स्वा॒हाका॒रेणेति॑ स्वाहा – का॒रेण॑ । प्र॒याजे॑ष्विति॑ प्र – या॒जेषु॑ ।
स॒मिति॑ । अ॒स्था॒पय॑न् । वी॒ति । वै । ए॒तत् । य॒ज्ञम् । छि॑न्दन्ति ।
यत् । स्वा॒हाका॒रेणेति॑ स्वाहा – का॒रेण॑ । प्र॒याजे॑ष्विति॑ प्र – या॒जेषु॑ ।
स॒ं स्था॒पय॑न्तीति॑ सं – स्था॒पय॑न्ति । प्र॒याजा॑निति॑ प्र – या॒जान् ।
इष्ट्वा॑ । ह॒वीं ष्य॑भि । अ॒भीति॑ । घा॒रय॑ति । य॒ज्ञस्य॑ । स॒न्तत्या॑ इति॑
सं – त॒त्यै । अथो॑ इति॑ । ह॒विः । ए॒व । अ॒कः । अथो॑ इति॑ ।

य॒था॒पू॒र्वमि॑ति॒ यथा॑ – पू॒र्वम् । उ॒पेति॑ । ए॒ति । पि॒ता । वै ।

प्र॒या॒जा इति॑ प्र – या॒जाः । प्र॒जेति॑ प्र – जा ।

अ॒नू॒या॒जा इत्य॑नु – या॒जाः । यत् । प्र॒या॒जानि॑ति॒ प्र – या॒जान् ।

इ॒ष्ट्वा । ह॒वी॒षि॑ । अ॒भि॒घा॒रय॑तीत्य॒भि – घा॒रय॑ति । पि॒ता । ए॒व ।

तत् । पु॒त्रेण॑ । सा॒धा॒रणम् । 6 (50)

TS 2.6.1.7

कुरु॑ते॒ तस्मा॑दाहु॒र्यश्चै॒वं वे॒द यश्च॑ न क॒था पु॒त्रस्य॑ के॒वलं
क॒था सा॒धा॒रणं पि॒तुरि॑त्य॒स्कन्न॑मे॒व तद्यत् प्र॒या॒जेष्वि॒ष्टेषु॑ स्क्व॒न्दति॑
गा॒य॒त्र्ये॒व तेन॑ गर्भं॑ ध॒त्ते सा॑ प्र॒जां प॒शून् यज॑मानाय॒ प्रज॑नयति ॥ 7

TS 2.6.1.7 - Padam

कुरु॑ते॒ । तस्मा॑त् । आ॒हुः । यः । च॒ । ए॒वम् । वे॒द । यः । च॒ । न ।
क॒था । पु॒त्रस्य॑ । के॒वलम् । क॒था । सा॒धा॒रणम् । पि॒तुः । इति॑ ।
अ॒स्कन्न॑म् । ए॒व । तत् । यत् । प्र॒या॒जेष्विति॑ प्र – या॒जेषु॑ । इ॒ष्टेषु॑ ।
स्क्व॒न्दति॑ । गा॒य॒त्री । ए॒व । तेन॑ । गर्भ॑म् । ध॒त्ते । सा॑ ।

प्र॒जामि॑ति प्र – जाम् । प॒शून् । यज॑मानाय । प्रेति॑ । ज॒नय॑ति ॥

7 (35) (यज॑ति य॒ज्ञामे॑वाव॒ रुन्धे॑ – त॒नून॑पातं॒ यँज॑ति – प्र॒याजा॑ना –
मे॒वं वै॒द प्र – रक्षो॑भ्यः – सा॒धार॑णं – पञ्च॑त्रिं॒शच्च॑) (A1)

TS 2.6.2.1

चक्षु॑षी वा ए॒ते य॒ज्ञस्य॑ यदाज्य॑भागौ यदाज्य॑भागौ यज॑ति
चक्षु॑षी ए॒व तद्-य॒ज्ञस्य॑ प्रति॑ दधाति॑ पूर्वा॒र्द्धे जु॑होति॒ तस्मात्॑
पूर्वा॒र्द्धे चक्षु॑षी प्र॒बाहु॑ग्-जुहोति॒ तस्मात्॑ प्र॒बाहु॑क् चक्षु॑षी दे॒वलो॑कं
ँवा अ॒ग्निना॑ यज॑मानोऽनु पश्य॑ति पि॒तृलो॑कं सोमे॑नोत्तरा॒र्द्धे
ऽनये॑ जुहोति॒ दक्षि॑णा॒र्द्धे सोमा॑यै॒वमि॑व॒ हीमौ॑ लो॒काव॑नयौ
लो॒कयो॑रनु॒ख्यात्यै॑ रा॒जानौ॑ वा ए॒तौ दे॒वता॑नां – [] 8

TS 2.6.2.1 - Padam

चक्षु॑षी इति॑ । वै । ए॒ते इति॑ । य॒ज्ञस्य॑ । यत् ।
आज्य॑भा॒गवि॒त्याज्य॑ – भा॒गौ । यत् । आ॒ज्यभा॒गवि॒त्याज्य॑-भा॒गौ ।
यज॑ति । चक्षु॑षी इति॑ । ए॒व । तत् । य॒ज्ञस्य॑ । प्र॒तीति॑ । द॒धाति॑ ।
पूर्वा॒र्द्ध इति॑ पूर्॒व – अ॒र्द्धे । जु॑होति॒ तस्मात्॑ । पूर्वा॒र्द्ध इति॑
पूर्॒व – अ॒र्द्धे । चक्षु॑षी इति॑ । प्र॒बाहु॑गिति॑ प्र – बा॒हुक् । जु॑होति॒ ।

तस्मात् । प्र॒बाहु॑गिति॒ प्र – बा॒हुक् । चक्षु॑षी॒ इति॑ । दे॒वलो॒कमिति॑
 दे॒व – लो॒कम् । वै । अ॒ग्निना॑ । यज॑मानः । अ॒न्विति॑ । प॒श्यति॑ ।
 पि॒तृलो॒कमिति॑ पि॒तृ-लो॒कम् । सोमे॑न । उ॒त्तरा॑र्ध इत्यु॒त्तर-अ॒र्धे ।
 अ॒ग्नये॑ । जु॒होति॑ । दक्षि॑णा॒र्ध इति॑ दक्षि॑ण-अ॒र्धे । सोमा॑य ।
 ए॒वम् । इ॒व । हि । इ॒मौ । लो॒कौ । अ॒नयोः॑ । लो॒कयोः॑ ।
 अ॒नु॒ख्यात्या॑ इत्यनु॑ – ख्या॒त्यै । राजा॑नौ । वै । ए॒तौ ।
 दे॒वता॑नाम् । 8 (50)

TS 2.6.2.2

य॒दग्नी॑षोमावन्तरा॒ दे॒वता॑ इज्येते॒ दे॒वता॑नां वि॒धृत्यै॑ तस्मा॒द्-राजा॑
 म॒नुष्या॑ वि॒धृता॑ ब्रह्म॒वादि॑नो वदन्ति किं तद्-य॒ज्ञे यज॑मानः कुरु॒ते
 येना॒न्यतो॑दतश्च प॒शून् दा॒धा-रो॑भयतो॒दत-श्चेत्यृ॑च-म॒नूच्या
 ऽऽज्य॑भागस्य जुषा॒णेन॑ यजति तेना॒न्यतो॑दतो दा॒धारर्च॑म॒नूच्य॑ ह॒विष॑
 ऋ॒चा यज॑ति तेनो॑भयतो॒दतो॑ दा॒धार मू॒र्धन्वती॑ पुरोऽनु॒वाक्या॑ भवति
 मू॒र्धान॑मे॒वैनं॑ समा॒नानां॑ करोति – [] 9

TS 2.6.2.2 - Padam

यत् । अ॒ग्नी॒षो॒मा॒वित्य॒ग्नी॒-सोमौ॑ । अ॒न्तरा॑ । दे॒वताः॑ । इ॒ज्ये॒ते इति॑ ।
 दे॒वता॑नाम् । वि॒धृ॒त्या इति॑ वि - धृ॒त्यै । तस्मा॑त् । राज्ञा॑ । म॒नुष्याः॑ ।
 वि॒धृ॒ता इति॑ वि - धृ॒ताः । ब्र॒ह्म॒वादि॒न इति॑ ब्र॒ह्म-वा॒दिनः॑ । व॒दन्ति॑ ।
 किम् । तत् । य॒ज्ञे । यज॑मानः । कु॒रुते॑ । येन॑ । अ॒न्यतो॑दत्
 इत्य॒न्यतः॑ - द॒तः । च । प॒शून् । दा॒धार । उ॒भयो॑दत्
 इत्यु॒भयतः॑-द॒तः । च । इति॑ । ऋ॒चम् । अ॒नूच्ये॑त्यनु - उ॒च्य ।
 आ॒ज्यभा॒गस्ये॒त्याज्य॑ - भा॒गस्य॑ । जु॒षाणे॑न । य॒जति॑ । तेन॑ ।
 अ॒न्यतो॑दत् इत्य॒न्यतः॑ - द॒तः । दा॒धार । ऋ॒चम् ।
 अ॒नूच्ये॑त्यनु - उ॒च्य । ह॒विषः॑ । ऋ॒चा । य॒जति॑ । तेन॑ । उ॒भयो॑दत्
 इत्यु॒भयतः॑ - द॒तः । दा॒धार । मू॒र्धन्व॑तीति मू॒र्धन् - वती॑ ।
 पु॒रोनु॒वाक्ये॑ति पु॒रः-अ॒नुवा॒क्या । भ॒वति॑ । मू॒र्धान॑म् । ए॒व । ए॒नम् ।
 स॒मा॒ना॒नाम् । क॒रोति॑ । 9 (50)

TS 2.6.2.3

नि॒यु॒त्व॒त्या य॒जति॑ भ्रा॒तृ॒व्यस्यै॒व प॒शून् नि यु॑वते के॒शिन॑ꣳह
 दा॒र्भ्यं के॒शी सा॒त्यका॑मि॒रुवा॑च स॒प्तप॑दां ते श॒क्वरी॑ꣳ श्वो य॒ज्ञे

प्र॒यो॒क्ता॒से॒ यस्यै॑ वी॒र्ये॑ण प्र जा॒तान्॑ भ्रातृ॒व्यान्नु॒दते॑ प्रति॒ जनि॑ष्यमाणा॒न्।
यस्यै॑ वी॒र्ये॑णो॒भयो॑ लो॒कयो॑ ज्योति॑ ध॒त्ते यस्यै॑ वी॒र्ये॑ण
पूर्वा॒र्धेनान॒ङ्वान् भु॒नक्ति॑ जघना॒र्धेन॑ धे॒नुरिति॑ पु॒रस्ता॑ल्लक्ष्मा
पु॒रोऽनु॒वाक्या॑ भवति जा॒ताने॒व भ्रातृ॒व्यान् प्रणु॑दत

उपरि॑ष्टाल्लक्ष्मा – [] 10

TS 2.6.2.3 - Padam

नि॒यु॒त्वत्ये॑ति नि – यु॒त्वत्या॑ । य॒जति॑ । भ्रातृ॒व्यस्य॑ । ए॒व । प॒शून् ।
नीति॑ । यु॒वते॑ । के॒शिन॑म् । ह॒ । दा॒र्भ्यम् । के॒शी ।
सा॒त्य॒का॒मि॒रिति॑ सा॒त्य – का॒मिः॑ । उ॒वाच॑ । स॒प्तप॑दा॒मिति॑
स॒प्त – प॒दाम् । ते॒ । श॒क्वरी॑म् । श्वः॑ । य॒ज्ञे । प्र॒यो॒क्ता॒स इति॑
प्र॒-यो॒क्ता॒से॒ । यस्यै॑ । वी॒र्ये॑ण । प्रेति॑ । जा॒तान् । भ्रातृ॒व्यान् । नु॒दते॑ ।
प्रतीति॑ । ज॒नि॒ष्यमा॑णा॒न् । यस्यै॑ । वी॒र्ये॑ण । उ॒भयोः॑ । लो॒कयोः॑ ।
ज्योतिः॑ । ध॒त्ते । यस्यै॑ । वी॒र्ये॑ण । पूर्वा॒र्धेनेति॑ पूर्व – अ॒र्धेन॑ ।
अ॒न॒ङ्वान् । भु॒नक्ति॑ । जघना॒र्धेनेति॑ जघन – अ॒र्धेन॑ । धे॒नुः ।

इति । पुरस्ताल्लक्ष्मेति पुरस्तात् – लक्ष्मा । पुरोऽनुवाक्येति
पुरः – अनुवाक्या । भवति । जातान् । एव । भ्रातृव्यान् । प्रेति ।
नुदते । उपरिष्ठाल्लक्ष्मेत्युपरिष्ठात् – लक्ष्मा । 10 (50)

TS 2.6.2.4

याज्या जनिष्यमाणानेव प्रतिनुदते पुरस्ताल्लक्ष्मा पुरोऽनुवाक्या
भवत्यस्मिन्नेव लोके ज्योतिर्धत्ते उपरिष्ठाल्लक्ष्मा याज्याऽमुष्मिन्नेव
लोके ज्योतिर्धत्ते ज्योतिष्मन्तावस्मा इमौ लोकौ भवतो य एवं वेद
पुरस्ताल्लक्ष्मा पुरोऽनुवाक्या भवति तस्मात् पूर्वार्धेनानुद्वान्
भुनक्त्युपरिष्ठाल्लक्ष्मा याज्या तस्माज्जघनार्धेन धेनुर्य एवं वेद भुङ्क्ते
एनमेतौ वज्र आज्यं वज्र आज्यभागौ – [] 11

TS 2.6.2.4 - Padam

याज्या । जनिष्यमाणान् । एव । प्रतीति । नुदते । पुरस्ताल्लक्ष्मेति
पुरस्तात् – लक्ष्मा । पुरोऽनुवाक्येति पुरः – अनुवाक्या । भवति ।
अस्मिन् । एव । लोके । ज्योतिः । धत्ते ।
उपरिष्ठाल्लक्ष्मेत्युपरिष्ठात् – लक्ष्मा । याज्या । अमुष्मिन् । एव ।
लोके । ज्योतिः । धत्ते । ज्योतिष्मन्तौ । अस्मै । इमौ । लोकौ ।

भवतः । यः । ए॒वम् । वे॒द । पु॒रस्ता॑ल्लक्ष्मेति पु॒रस्ता॑त् – लक्ष्मा ।
 पु॒रो॒नुवा॑क्येति पु॒रः – अ॒नुवा॑क्या । भ॒वति॑ । तस्मा॑त् ।
 पूर्वा॑र्धनेति पूर्॒व – अ॒र्धने॑ । अ॒न॒ड्वान् । भु॒नक्ति॑ ।
 उ॒परि॑ष्टाल्लक्ष्मेत्यु॒परि॑ष्टात् – लक्ष्मा । या॒ज्या । तस्मा॑त् ।
 ज॒घना॑र्धनेति जघन – अ॒र्धने॑ । धे॒नुः । यः । ए॒वम् । वे॒द ।
 भु॒ङ्क्तेः । ए॒नम् । ए॒तौ । व॒ज्रः । आ॒ज्यम् । व॒ज्रः ।
 आ॒ज्यभा॑गावित्याज्य – भा॒गौ । 11 (50)

TS 2.6.2.5

व॒ज्रो व॑षट्कारस्त्रि॒वृ॒तमे॒व व॒ज्रं स॑म्भृत्य भ्रातृ॒व्याय॑ प्र
 ह॒रत्य॑च्छम्बट्कार-म॒प॒गूर्य॑ व॑षट्करोति स्तृ॒त्यै गा॒यत्री॑ पु॒रोऽनु॑वा॒क्या
 भ॒वति॑ त्रि॒ष्टुग् या॒ज्या ब्र॑ह्मन्ने॒व क्ष॒त्रम॒न्वारं॑ भ॒यति॑ तस्मा॑द्ब्राह्म॒णो
 मु॒ख्यो मु॒ख्यो भ॒वति॑ य ए॒वं वे॒द प्रै॒वैनं॑ पु॒रोऽनु॑वा॒क्यया॑ ऽह
 प्र॒णय॑ति या॒ज्यया॑ ग॒मय॑ति व॑षट्कारेणै॒वैनं॑ पु॒रोऽनु॑वा॒क्यया॑ द॒त्ते
 प्र॒ यच्छ॑ति या॒ज्यया॑ प्र॒ति – [] 12

TS 2.6.2.5 - Padam

वज्रः । वषट्कार इति वषट् – कारः । त्रिवृतमिति त्रि – वृतम् ।
एव । वज्रम् । संभृत्येति सं – भृत्य । भ्रातृव्याय । प्रेति । हरति ।
अछंबट्कारमित्यछंबट् – कारम् । अपगूर्येत्यप – गूर्य । वषट् ।
करोति । स्तृत्यै । गायत्री । पुरोनुवाक्येति पुरः – अनुवाक्या ।
भवति । त्रिष्टुक् । याज्या । ब्रह्मन् । एव । क्षत्रम् ।
अन्वारंभयतीत्यनु – आरंभयति । तस्मात् । ब्राह्मणः । मुख्यः ।
मुख्यः । भवति । यः । एवम् । वेद । प्रेति । एव । एनम् ।
पुरोनुवाक्ययेति पुरः – अनुवाक्यया । आह । प्रेति । नयति ।
याज्यया । गमयति । वषट्कारेणेति वषट् – कारेण । एति । एव ।
एनम् । पुरोनुवाक्ययेति पुरः – अनुवाक्यया । दत्ते । प्रेति । यच्छति ।
याज्यया । प्रतीति । 12 (50)

TS 2.6.2.6

वषट्कारेण स्थापयति त्रिपदा पुरोऽनुवाक्या भवति त्रय इमे लोका
एष्वेव लोकेषु प्रतितिष्ठति चतुष्पदा याज्या चतुष्पद एव पशूनव रुन्धे
द्व्यक्षरो वषट्कारो द्विपाद्-यजमानः पशुष्वेवोपरिष्ठात् प्रतितिष्ठति

गा॒य॒त्री पु॒रोऽनु॒वा॒क्या भ॒वति त्रि॒ष्टुग् या॒ज्यै॒षा वै स॒प्तप॒दा श॒क्वरी॒
यद्वा ए॒तया॑ दे॒वा अ॒शि॒क्षन् तद॑श॒क्नुवन्॒ य ए॒वं वै॒द
श॒क्नो॒त्येव॒ () यच्छि॑क्षति ॥ 13

TS 2.6.2.6 - Padam

व॒षट्का॒रेणे॑ति व॒षट् - का॒रेण॑ । स्था॒पय॑ति । त्रि॒पदे॑ति त्रि - प॒दा ।
पु॒रोनु॒वा॒क्ये॑ति पु॒रः - अ॒नुवा॒क्या । भ॒वति॑ । त्रयः॑ । इ॒मे । लो॒काः ।
ए॒षु । ए॒व । लो॒केषु॑ । प्र॒तीति॑ । ति॒ष्ठति॑ । चतु॑ष्पदेति चतुः - प॒दा ।
या॒ज्या । चतु॑ष्पद इति चतुः-प॒दः । ए॒व । प॒शून् । अ॒वेति॑ । रु॒न्धे ।
द्व्य॒क्षर॑ इति द्वि - अ॒क्षरः॑ । व॒षट्का॒र इति॑ व॒षट् - का॒रः ।
द्वि॒पादि॑ति द्वि-पात् । यज॑मानः । प॒शुषु॑ । ए॒व । उ॒परि॑ष्ठात् । प्र॒तीति॑ ।
ति॒ष्ठति॑ । गा॒य॒त्री । पु॒रोनु॒वा॒क्ये॑ति पु॒रः - अ॒नुवा॒क्या । भ॒वति॑ ।
त्रि॒ष्टुक् । या॒ज्या । ए॒षा । वै । स॒प्तप॒देति॑ स॒प्त - प॒दा । श॒क्वरी॑ ।
यत् । वै । ए॒तया॑ । दे॒वाः । अ॒शि॒क्षन् । तत् । अ॒श॒क्नुवन्॒ । यः ।

ए॒वम् । वे॒द । श॒क्नो॒ति । ए॒व () । यत् । शि॒क्ष॒ति ॥ 13 (52)

(दे॒वता॑नां – करो॒त्यु – परि॑ष्टाल्लक्ष्मा – ऽऽज्य॑भागौ – प्रति॑ –
श॒क्रो॒त्ये॒व – द्वे च॑) (A2)

TS 2.6.3.1

प्र॒जा॒प॒ति॒र्दे॒वेभ्यो॑ य॒ज्ञान् व्यादि॑शत् स आ॒त्मन्नाज्य॑मधत्त तं दे॒वा
अ॒ब्रुव॑न्नेष वाव य॒ज्ञो यदा॑ज्यमप्ये॒व नोऽन्ना॒स्त्विति॑ सोऽब्र॑वीद्-य॒जान् व
आज्य॑भागा॒वुप स्तृ॑णान॒भि घा॑रयानि॒ति तस्मा॑द्-यज॒न्त्या-ज्य॑भागा॒वुप
स्तृ॑णन्त्य॒भि घा॑रयन्ति ब्र॒ह्मवा॑दिनो वदन्ति॒ कस्मा॑त् स॒त्याद्-
या॒तया॑मा॒न्यन्या॑नि ह॒वी-ष्य॑या॒तयाम॑-माज्य॑मिति प्राजाप॒त्य - [] 14

TS 2.6.3.1 - Padam

प्र॒जा॒प॒ति॒रिति॑ प्र॒जा – प॒तिः । दे॒वेभ्यः॑ । य॒ज्ञान् । व्यादि॑श॒दिति॑
वि – आदि॑शत् । सः । आ॒त्मन् । आ॒ज्यम् । अ॒धत्त॑ । तम् । दे॒वाः ।
अ॒ब्रुव॑न् । ए॒षः । वाव । य॒ज्ञः । यत् । आ॒ज्यम् । अपी॑ति । ए॒व ।
नः । अ॒त्र । अ॒स्तु । इति॑ । सः । अ॒ब्रवी॑त् । य॒जान् । वः ।
आज्य॑भागा॒वित्याज्य॑ – भा॒गौ । उपे॑ति । स्तृ॑णान् । अ॒भीति॑ ।
घा॒रयान् । इति॑ । तस्मा॑त् । यज॒न्ति । आ॒ज्यभागा॑वित्याज्य – भा॒गौ ।

उ॒पेति॑ । स्तृ॒णन्ति॑ । अ॒भीति॑ । घा॒रय॑न्ति । ब्र॒ह्म॒वादि॑न इति॑
 ब्र॒ह्म – वा॒दिनः॑ । व॒दन्ति॑ । कस्मा॑त् । स॒त्यात् । या॒तया॑मा॒नीति॑
 या॒त – या॒मा॒नि । अ॒न्यानि॑ । ह॒वी॒षि । अ॒या॒तया॑म॒मित्य॑या॒त – या॒मम् ।
 आ॒ज्यम् । इति॑ । प्रा॒जाप॑त्यमिति॑ प्रा॒जा – प॒त्यम् । 14 (50)

TS 2.6.3.2

–मिति॑ ब्रू॒याद॑या॒तया॑मा हि दे॒वानां॑ प्र॒जाप॑तिरिति॑ छन्दा॑सि
 दे॒वेभ्यो॑ऽपा॒क्राम॑न् न वोऽभा॒गानि॑ ह॒व्यं वक्ष्या॑म इति॑ तेभ्य॑
 ए॒त–च॑तुरव॒त्त–म॑धा॒रय॑न् पु॒रोऽनु॑वा॒क्यायै॑ या॒ज्यायै॑ दे॒वता॑यै
 वषट्का॑राय॒ यच्च॑तुरव॒त्तं जु॒होति॑ छन्दा॑स्ये॒व तत् प्री॑णाति॒ तान्य॑स्य
 प्री॒तानि॑ दे॒वेभ्यो॑ ह॒व्यं वह॑न्त्यङ्गि॒रसो॑ वा इ॒त उत्त॑माः सु॒वर्गं
 लो॒कमा॑यन् तदृष॑यो य॒ज्ञवा॑स्त्वभ्य॒वाय॑न् ते – [] 15

TS 2.6.3.2 - Padam

इति॑ । ब्रू॒यात् । अ॒या॒तया॑मे॒त्यया॑त – या॒मा । हि । दे॒वाना॑म् ।
 प्र॒जाप॑तिरिति॑ प्रा॒जा – प॒तिः । इति॑ । छन्दा॑सि । दे॒वेभ्यः॑ । अ॒पेति॑ ।
 अ॒क्राम॑न् । न । वः । अ॒भा॒गानि॑ । ह॒व्यम् । वक्ष्या॑मः । इति॑ ।
 तेभ्यः॑ । ए॒तत् । च॒तुर॒वत्त॑मिति॑ चतुः – अ॒वत्त॑म् । अ॒धा॒रय॑न् ।

पुरो॑नु॒वाक्या॑या इति॑ पुरः – अनु॑वाक्या॒यै । या॒ज्या॒यै । दे॒वता॑यै ।
व॒षट्का॑रायेति॑ वषट् – का॒राय॑ । यत् ।
चतु॑रव॒त्तमि॑ति चतुः – अ॒वत्त॑म् । जु॒होति॑ । छन्दा॑ँसि । ए॒व । तत् ।
प्री॒णाति॑ । तानि॑ । अ॒स्य । प्री॒तानि॑ । दे॒वेभ्यः॑ । ह॒व्यम् । व॒हन्ति॑ ।
अङ्गि॑रसः । वै । इ॒तः । उ॒त्तमा॑ इत्युत् – त॒माः । सु॒वर्गमि॑ति
सुवः – गम् । लो॒कम् । आ॒यन् । तत् । ऋष॑यः । य॒ज्ञवा॑स्त्विति॑
य॒ज्ञ – वा॒स्तु । अ॒भ्यवा॑यन्नित्यभि – अ॒वायन् । ते । 15 (50)

TS 2.6.3.3

ऽप॒श्यन् पुरो॑डाशं कूर्मं॑ भू॒तँ सर्प॑न्तं तम॑ब्रुवन्निन्द्रा॑य ध्रिय॑स्व
बृ॒हस्प॑तये ध्रिय॑स्व वि॒श्वेभ्यो॑ दे॒वेभ्यो॑ ध्रिय॑स्वेति स नादि॑ध्रयत
तम॑ब्रुवन्न॒ग्नये॑ ध्रिय॑स्वेति सौ॒ग्नये॑ऽदि॒ध्रय॑त यदा॑ग्नेयो-
ऽष्टा॑कपालो- ऽमा॒वास्या॑यां च पौ॒र्णमा॑स्यां चा॒च्युतो॑ भवति
सु॒वर्गस्य॑ लो॒कस्या॑भिजित्यै॑ तम॑ब्रुवन् क॒थाऽहा॑स्था इत्यनु॑पाक्तो
ऽभू॒वमित्य॑ब्रवीद्-यथा॑ऽक्षोऽनु॑पाक्तो – [] 16

TS 2.6.3.3 - Padam

अ॒प॒श्य॒न् । पु॒रो॒डा॒शम् । कूर्म॑म् । भू॒तम् । सर्प॑न्तम् । तम् ।
अ॒ब्रु॒वन् । इन्द्रा॑य । ध्रि॒यस्व॑ । बृ॒हस्प॑तये । ध्रि॒यस्व॑ । वि॒श्वेभ्यः॑ ।
दे॒वेभ्यः॑ । ध्रि॒यस्व॑ । इति॑ । सः । न । अ॒दि॒ध्रय॑त । तम् । अ॒ब्रु॒वन् ।
अ॒ग्नये॑ । ध्रि॒यस्व॑ । इति॑ । सः । अ॒ग्नये॑ । अ॒दि॒ध्रय॑त । यत् ।
आ॒ग्नेयः॑ । अ॒ष्टाक॑पाल इत्य॒ष्टा – क॒पालः॑ ।
अ॒मावा॑स्याया॒मित्य॑मा – वा॒स्यायाम् । च । पौ॒र्णमा॑स्यामिति॑
पौ॒र्ण – मा॒स्याम् । च । अ॒च्यु॒तः । भव॑ति । सु॒वर्ग॑स्येति॑
सुवः॑ – ग॒स्य । लो॒कस्य॑ । अ॒भिजि॑त्या इत्य॒भि – जि॒त्यै । तम् ।
अ॒ब्रु॒वन् । क॒था । अ॒हास्थाः॑ । इति॑ । अ॒नुपा॑क्त इत्य॒नुप – अ॒क्तः॑ ।
अ॒भू॒वम् । इति॑ । अ॒ब्रवी॑त् । यथा॑ । अक्षः॑ ।
अ॒नुपा॑क्त इत्य॒नुप – अ॒क्तः॑ । 16 (50)

TS 2.6.3.4

ऽवा॒च्छत्ये॑वमवा॑ ऽऽर॒मित्यु॑परि॒ष्टा-द॒भ्यज्या॑धस्ता॒-दुपा॑नक्ति सु॒वर्ग॑स्य
लो॒कस्य॑ सम॒ष्ट्यै सर्वा॑णि क॒पालान्य॑भि प्रथयति॑ तावतः॑
पु॒रो॒डा॒शान॑मुष्मिन् लो॒केऽभि॑ जयति॑ यो विद॑ग्धः स नैर्ऋ॑तो

योऽशृतः स रौद्रो यः शृतः स सदेवस्तस्मादविदहता शृतंकृत्यः
 सदेवत्वाय भस्मनाऽभि वासयति तस्मान्मासेनास्थि छन्नं
 वेदेनाभि वासयति तस्मात् – [] 17

TS 2.6.3.4 - Padam

अवाच्छतीत्यव – ऋच्छति । एवम् । अवेति । आरम् । इति ।
 उपरिष्ठात् । अभ्यज्येत्यभि – अज्य । अधस्तात् । उपेति । अनक्ति ।
 सुवर्गस्येति सुवः – गस्य । लोकस्य । समष्ट्या इति सं-अष्ट्यै ।
 सर्वाणि । कपालानि । अभीति । प्रथयति । तावतः । पुरोडाशान् ।
 अमुष्मिन् । लोके । अभीति । जयति । यः । विदग्ध इति
 वि – दग्धः । सः । नैर्ऋत इति नैः-ऋतः । यः । अशृतः । सः ।
 रौद्रः । यः । शृतः । सः । सदेव इति स – देवः । तस्मात् ।
 अविदहतेत्यवि – दहता । शृतंकृत्य इति शृतं – कृत्यः ।
 सदेवत्वायेति सदेव – त्वाय । भस्मना । अभीति । वासयति ।
 तस्मात् । मासेन । अस्थि । छन्नम् । वेदेन । अभीति ।
 वासयति । तस्मात् । 17 (50)

TS 2.6.3.5

केशैः शिरः छन्नं प्रच्युतं वा एतदस्मात् लोकादगतं देवलोकं
 यच्छ्रुत् हविरनभिधारित-मभिघार्योद्-वासयति देवत्रैवैनद्-गमयति
 यद्येकं कपालं नश्येदेको मासः सँवत्सरस्यानवेतः स्यादथ यजमानः
 प्रमीयेत यद् द्वे नश्येतां द्वौ मासौ सँवत्सरस्यानवेतौ स्यातामथ
 यजमानः प्रमीयेत सङ्ख्यायोद्-वासयति यजमानस्य - [] 18

TS 2.6.3.5 - Padam

केशैः । शिरः । छन्नम् । प्रच्युतमिति प्र - च्युतम् । वै । एतत् ।
 अस्मात् । लोकात् । अगतम् । देवलोकमिति देव - लोकम् । यत् ।
 श्रुतम् । हविः । अनभिधारितमित्यनभि - धारितम् ।
 अभिघार्येत्यभि - धार्य । उदिति । वासयति । देवत्रेति देव - त्रा ।
 एव । एनत् । गमयति । यदि । एकम् । कपालम् । नश्येत् । एकः ।
 मासः । सँवत्सरस्येति सं - वत्सरस्य । अनवेत इत्यनव - इतः ।
 स्यात् । अथ । यजमानः । प्रेति । मीयेत । यत् । द्वे इति ।
 नश्येताम् । द्वौ । मासौ । सँवत्सरस्येति सं - वत्सरस्य ।
 अनवेतावित्यनव - इतौ । स्याताम् । अथ । यजमानः । प्रेति ।

मी॒येत॑ । सं॒ख्या॒येति॑ सं – ख्या॒य । उ॒दि॒ति । वा॒स॒य॒ति ।

यज॑मानस्य । 18 (50)

TS 2.6.3.6

गो॒पी॒था॒य॒ यदि॑ न॒श्ये॑दा॒श्विनं॑ द्वि॒क॒पा॒लं निर्व॑पेद् द्या॒वापृ॑थि॒व्य-
मे॒क॒क॒पा॒लम॑श्वि॒नौ वै दे॒वानां॑ भि॒ष॒जौ ताभ्या॑मे॒वास्मै॑ भेष॒जं
क॒रोति॑ द्या॒वापृ॑थि॒व्य एक॑क॒पा॒लो भव॑त्यनयो॒र्वा ए॒तन्न॑श्यति॒ यन्न॑श्य-
त्यनयो॑रे॒वैन॑द्-वि॒न्दति॑ प्र॒ति॒ष्ठि॒त्यै ॥ 19

TS 2.6.3.6 - Padam

गो॒पी॒था॒य॒ । यदि॑ । न॒श्ये॑त् । आ॒श्वि॒नम् । द्वि॒क॒पा॒लमि॑ति
द्वि – क॒पा॒लम् । नि॒रि॒ति । व॒पे॒त् । द्या॒वापृ॑थि॒व्यमि॑ति
द्या॒वा – पृ॒थि॒व्यम् । एक॑क॒पा॒लमि॒त्येक॑-क॒पा॒लम् । अ॒श्वि॒नौ । वै ।
दे॒वाना॑म् । भि॒ष॒जौ । ताभ्या॑म् । ए॒व । अ॒स्मै । भेष॒जम् । क॒रोति॑ ।
द्या॒वापृ॑थि॒व्य इति॑ द्या॒वा – पृ॒थि॒व्यः । एक॑क॒पा॒ल इत्ये॑क॒-क॒पा॒लः ।
भव॑ति । अ॒नयोः॑ । वै । ए॒तत् । न॒श्यति॑ । यत् । न॒श्यति॑ । अ॒नयोः॑ ।

ए॒व । ए॒नत् । वि॒न्द॒ति । प्र॒ति॒ष्ठि॒त्या इति॑ प्र॒ति – स्थि॒त्यै ॥ 19 (32)

(प्र॒जा॒प॒त्यं – ते – ऽक्षो॑ऽनु॒पा॒क्तो – वे॒दे॒ना॒भि वा॑स॒यति॑ तस्मा॒द् –
यज॑मा॒नस्य॑ – द्वा॒त्रिं॑श॒च्च) (A3)

TS 2.6.4.1

दे॒वस्य॑ त्वा स॒वि॒तुः प्र॒स॒व इति॑ स्फ्य॒मा द॑त्ते प्र॒सू॒त्या अ॒श्विनौ॑
बा॒हुभ्या॑मि॒त्याहा॑-श्विनौ॑ हि दे॒वाना॑म॒ध्व॒र्यू आ॒स्तां पू॒ष्णो
ह॒स्ताभ्या॑मि॒त्याह॑ य॒त्यै श॒तभृ॑ष्टि॒रसि॑ वा॒नस्प॑त्यो द्वि॒षतो॑ व॒ध इत्या॑ह
वज्र॑मे॒व तथ् स॒श्र॑यति॒ भ्रातृ॑व्याय प्र॒हरि॑ष्यन्थ् स्त॒म्ब
य॒जुर्. ह॒रत्ये॑ता॒वती॑ वै पृ॒थि॒वी या॑वती॒ वेदि॑स्तस्या॒ एता॑व॒त ए॒व
भ्रातृ॑व्यं निर्भ॑जति – [] 20

TS 2.6.4.1 - Padam

दे॒वस्य॑ । त्वा । स॒वि॒तुः । प्र॒स॒व इति॑ प्र – स॒वे । इति॑ । स्फ्य॒म् ।
एति॑ । द॒त्ते । प्र॒सू॒त्या इति॑ प्र – सू॒त्यै । अ॒श्विनौ॑ ।
बा॒हुभ्या॑मि॒ति बा॒हु-भ्या॑म् । इति॑ । आ॒ह । अ॒श्विनौ॑ । हि । दे॒वाना॑म् ।
अ॒ध्व॒र्यू इति॑ । आ॒स्ताम् । पू॒ष्णः । ह॒स्ताभ्या॑म् । इति॑ । आ॒ह ।
य॒त्यै । श॒तभृ॑ष्टि॒रिति॑ श॒त – भृ॑ष्टिः । अ॒सि । वा॒नस्प॑त्यः । द्वि॒षतः ।

व॒धः । इति॑ । आ॒ह॒ । व॒ज्रम् । ए॒व । तत् । स॒मि॒ति॑ । इ॒त्य॒ति॑ ।
 भ्रा॒तृ॒व्या॒य॒ । प्र॒ह॒रि॒ष्य॒न्निति॑ प्र – ह॒रि॒ष्य॒न् । स्त॒ंब॒य॒जु॒रिति॑
 स्त॒ंब – य॒जुः । ह॒र॒ति॑ । ए॒ता॒व॒ती॑ । वै । पृ॒थि॒वी॑ । या॒व॒ती॑ । वे॒दिः ।
 तस्याः॑ । ए॒ता॒व॒तः॑ । ए॒व । भ्रा॒तृ॒व्य॒म् । नि॒रि॒ति॑ । भ॒ज॒ति॑ । 20 (50)

TS 2.6.4.2

तस्मा॒न्ना॒भा॒गं॑ नि॒र्भ॒ज॒न्ति॑ त्रि॒र्ह॒र॒ति॑ त्रय॑ इ॒मे लो॒का ए॒भ्य ए॒वैनं॑
 लो॒के॒भ्यो॑ नि॒र्भ॒ज॒ति॑ तू॒ष्णीं॑ च॒तु॒र्थं॑ ह॒र॒त्य॒परि॒मि॒तादे॒वैनं॑
 नि॒र्भ॒ज॒त्यु॒द्ध॒न्ति॑ यदे॒वास्या॑ अमे॒द्ध्यं॑ तदप॑ ह॒न्त्यु॒द्ध॒न्ति॑
 तस्मा॒दोष॑ध॒यः॒ परा॑ भव॒न्ति॒ मूलं॑ छि॒न॒न्ति॒ भ्रा॒तृ॒व्यस्यै॒व मूलं॑ छि॒न॒न्ति॑
 पि॒तृदे॒वत्याऽति॑खा॒तेय॒तीं॑ ख॒न॒ति॒ प्र॒जाप॑ति॒ना – [] 21

TS 2.6.4.2 - Padam

तस्मा॒त् । न । अ॒भा॒गम् । नि॒रि॒ति॑ । भ॒ज॒न्ति॑ । त्रिः॑ । ह॒र॒ति॑ । त्रयः॑ ।
 इ॒मे । लो॒काः । ए॒भ्यः । ए॒व । ए॒नम् । लो॒के॒भ्यः । नि॒रि॒ति॑ ।
 भ॒ज॒ति॑ । तू॒ष्णीम् । च॒तु॒र्थम् । ह॒र॒ति॑ । अ॒परि॒मि॒तादि॒त्यपरि॑-मि॒तात् ।
 ए॒व । ए॒नम् । नि॒रि॒ति॑ । भ॒ज॒ति॑ । उ॒दि॒ति॑ । ह॒न्ति॑ । यत् । ए॒व ।
 अ॒स्याः । अ॒मे॒द्ध्यम् । तत् । अ॒पे॒ति॑ । ह॒न्ति॑ । उ॒दि॒ति॑ । ह॒न्ति॑ ।

तस्मात् । ओषधयः । परेति । भवन्ति । मूलम् । छिनत्ति ।

भ्रातृव्यस्य । एव । मूलम् । छिनत्ति । पितृदेवत्येति पितृ – देवत्या ।

अतिखातेत्यति – खाता । इयतीम् । खनति ।

प्रजापतिनेति प्रजा – पतिना । 21 (50)

TS 2.6.4.3

यज्ञमुखेन संमितामा प्रतिष्ठायै खनति यजमानमेव प्रतिष्ठां गमयति
दक्षिणतो वर्षीयसीं करोति देवयजनस्यैव रूपमकः पुरीषवतीं करोति
प्रजावै पशवः पुरीषं प्रजयैवैनं पशुभिः पुरीषवन्तं करोत्युत्तरं परिग्राहं
परि गृह्णात्येतावती वै पृथिवी यावती वेदिस्तस्या एतावत एव भ्रातृव्यं
निर्भज्याऽऽत्मन उत्तरं परिग्राहं परिगृह्णाति क्रूरमिव वा – [] 22

TS 2.6.4.3 - Padam

यज्ञमुखेनेति यज्ञ – मुखेन । संमितामिति सं – मिताम् । एति ।

प्रतिष्ठाया इति प्रति – स्थायै । खनति । यजमानम् । एव ।

प्रतिष्ठामिति प्रति – स्थाम् । गमयति । दक्षिणतः । वर्षीयसीम् ।

करोति । देवयजनस्येति देव – यजनस्य । एव । रूपम् । अकः ।

पुरीषवतीमिति पुरीष – वतीम् । करोति । प्रजेति प्र – जा । वै ।

प॒शवः॑ । पु॒री॒ष॒म् । प्र॒ज॒ये॒ति॑ प्र – ज॒या॑ । ए॒व । ए॒न॒म् । प॒शु॒भि॒रि॒ति॑
 प॒शु – भिः॑ । पु॒री॒ष॒व॒न्त॒मि॒ति॑ पु॒री॒ष – व॒न्त॒म् । क॒रो॒ति॑ ।
 उ॒त्तर॑मि॒त्यु॒त् – त॒र॒म् । प॒रि॒ग्रा॒ह॒मि॒ति॑ प॒रि – ग्रा॒ह॒म् । प॒री॒ति॑ । गृ॒ह्णा॒ति॑ ।
 ए॒ता॒व॒ती॑ । वै । पृ॒थि॒वी॑ । या॒व॒ती॑ । वे॒दिः॑ । त॒स्याः॑ । ए॒ता॒व॒तः॑ । ए॒व ।
 भ्रा॒तृ॒व्य॒म् । नि॒र्भ॒ज्ये॒ति॑ निः – भ॒ज्य॑ । आ॒त्म॒नै॑ ।
 उ॒त्तर॑मि॒त्यु॒त् – त॒र॒म् । प॒रि॒ग्रा॒ह॒मि॒ति॑ प॒रि – ग्रा॒ह॒म् । प॒री॒ति॑ । गृ॒ह्णा॒ति॑ ।
 क्रू॒र॒म् । इ॒व । वै । 22 (50)

TS 2.6.4.4

ए॒तत् क॒रो॒ति॑ य॒द्वे॒दिं क॒रो॒ति॑ धा अ॒सि॒ स्व॒धा अ॒सी॒ति॑ यो॒यु॒प्य॒ते॒
 शा॒न्त्यै॒ प्रो॒क्ष॒णी॒रा सा॒दय॑त्यापो वै र॒क्षो॒घ्नी॑ र॒क्ष॒सा॒मप॑हत्यै
 स्फ्य॒स्य॒व॒र्त्म॑न्त् सा॒दय॑ति य॒ज्ञ॒स्य॒ स॒न्त॒त्यै॒यं द्वि॒ष्या॒त्
 तं ध्या॑येच्छु॒चै॒वैन॑म॒र्पय॑ति ॥ 23

TS 2.6.4.4 - Padam

ए॒तत् । क॒रो॒ति॑ । यत् । वे॒दि॒म् । क॒रो॒ति॑ । धाः । अ॒सि॒ ।
 स्व॒धे॒ति॑ स्व – धा । अ॒सि॒ । इ॒ति॑ । यो॒यु॒प्य॒ते॒ । शा॒न्त्यै॑ ।
 प्रो॒क्ष॒णी॒रि॒ति॑ प्र – उ॒क्ष॒णीः॑ । ए॒ति॑ । सा॒दय॑ति । आ॒पः॑ । वै ।

र॒क्षो॒घ्नी॒रिति॑ र॒क्षः – घ्नीः । र॒क्ष॒साम् । अ॒प॒ह॒त्या इ॒त्यप॑ – ह॒त्यै ।
स्फ॒य॒स्य॑ । व॒र्त्मन् । सा॒द॒य॒ति॑ । य॒ज्ञ॒स्य॑ । स॒न्त॒त्या इति॑ सं – त॒त्यै ।
यम् । द्वि॒ष्यात् । तम् । ध्या॒येत् । शु॒चा । ए॒व । ए॒नम् ।

अ॒र्प॒य॒ति॑ ॥ 23 (33)

(भ॒ज॒ति – प्र॒जाप॑तिने – व॒ वै – त्रय॑स्त्रि॒ञ्श॒च्च) (A4)

TS 2.6.5.1

ब्र॒ह्म॒वा॒दि॒नो॑ व॒द॒न्त्य॒द्भिर्-ह॒वी॒षि॑ प्रौ॒क्षीः॑ के॒नाप॑ इति॑ ब्र॒ह्म॒णे॒ति॑
ब्रू॒या॒द॒द्भि-ह्वै॑व॒ ह॒वी॒षि॑ प्रो॒क्ष॒ति॑ ब्र॒ह्म॒णा॒ऽप॑ इ॒द्ध्मा॒ब॒र्हिः॑ प्रो॒क्ष॒ति॑
मे॒द्ध्य॑मे॒वैन॑त् करो॒ति॑ वे॒दिं प्रो॒क्ष॒त्यृ॒क्षा॑ वा ए॒षाऽलो॒मका॑ऽमे॒द्ध्या॑
यद्-वे॒दि॒र्मे॒द्ध्या-मे॒वैनां॑ करो॒ति॑ दि॒वे त्वाऽन्त॑रि॒क्षाय॑ त्वा पृ॒थि॒व्यै
त्वे॒ति॑ ब॒र्हि॒सा॒द्य प्रो – [] 24

TS 2.6.5.1 - Padam

ब्र॒ह्म॒वा॒दि॒न इति॑ ब्र॒ह्म – वा॒दि॒नः॑ । व॒द॒न्ति॑ । अ॒द्भि॒रि॒त्यत् – भिः॑ ।
ह॒वी॒षि॑ । प्रे॒ति॑ । औ॒क्षीः॑ । के॒न । अ॒पः॑ । इति॑ । ब्र॒ह्म॒णा॑ । इति॑ ।
ब्रू॒यात् । अ॒द्भि॒रि॒त्यत् – भिः॑ । हि॑ । ए॒व । ह॒वी॒षि॑ ।
प्रो॒क्ष॒तीति॑ प्र – उ॒क्ष॒ति॑ । ब्र॒ह्म॒णा॑ । अ॒पः॑ ।

इ॒ध्मा॒ब॒र्हि॒रि॒ती॒ध्मा – ब॒र्हिः । प्रेति॑ । उ॒क्ष॒ति॒ । मे॒द्ध्य॑म् । ए॒व ।
 ए॒न॒त् । क॒रो॒ति॒ । वे॒दि॑म् । प्रेति॑ । उ॒क्ष॒ति॒ । ऋ॒क्षा । वै । ए॒षा ।
 अ॒लो॒म॒का॒ । अ॒मे॒द्ध्य॑ । यत् । वे॒दिः । मे॒द्ध्य॑म् । ए॒व । ए॒ना॒म् ।
 क॒रो॒ति॒ । दि॒वे । त्वा । अ॒न्त॒रि॒क्षाय॑ । त्वा । पृ॒थि॒व्यै । त्वा । इति॑ ।
 ब॒र्हिः । आ॒सा॒द्ये॒त्या – सा॒द्य । प्रेति॑ । 24 (50)

TS 2.6.5.2

–क्ष॑त्येभ्य ए॒वैन॑ल्लो॒केभ्यः॑ प्रो॒क्ष॑ति कू॒रमि॑व वा ए॒तत् क॑रोति यत्
 ख॑नत्यपो नि॒नय॑ति शान्त्यै॑ पु॒रस्ता॑त् प्र॒स्तरं॑ गृ॒ह्णा॑ति मु॒ख्यमे॒वैनं॑
 क॑रोतीयन्तं गृ॒ह्णा॑ति प्र॒जाप॑तिना यज्ञमु॒खेन॑ संमि॒तं ब॒र्हिः स्तृ॑णाति
 प्र॒जा वै ब॒र्हिः पृ॑थि॒वी वे॒दिः प्र॒जा ए॒व पृ॑थि॒व्यां
 प्र॑तिष्ठापयत्यनतिदृ॒श्नं स्तृ॑णाति प्र॒जयै॒वैनं॑ प॒शुभि॑रनतिदृ॒श्नं

करो – [] 25

TS 2.6.5.2 - Padam

उ॒क्ष॒ति॒ । ए॒भ्यः । ए॒व । ए॒न॒त् । लो॒के॒भ्यः । प्रेति॑ । उ॒क्ष॒ति॒ । कू॒रम् ।
 इ॒व । वै । ए॒तत् । क॒रो॒ति॒ । यत् । ख॑नति । अ॒पः । नी॒ति॒ । न॒य॒ति॒ ।
 शान्त्यै॑ । पु॒रस्ता॑त् । प्र॒स्तर॑मिति प्र – स्त॒रम् । गृ॒ह्णा॑ति । मु॒ख्यम् ।

ए॒व । ए॒नम् । क॒रो॒ति । इ॒यन्त॑म् । गृ॒ह्णा॒ति । प्र॒जाप॑ति॒नेति॑
 प्र॒जा – प॒तिना॑ । य॒ज्ञमु॒खेने॑ति य॒ज्ञ – मु॒खेन॑ । सं॒मित॑मि॒ति
 सं – मि॒तम् । ब॒र्हिः । स्तृ॒णा॒ति । प्र॒जा इति॑ प्र – जाः । वै ।
 ब॒र्हिः । पृ॒थि॒वी । वेदिः॑ । प्र॒जा इति॑ प्र – जाः । ए॒व । पृ॒थि॒व्याम् ।
 प्र॒तीति॑ । स्था॒पय॑ति । अ॒नति॑दृ॒श्नमि॒त्यन॑ति – दृ॒श्नम् । स्तृ॒णा॒ति ।
 प्र॒जये॑ति प्र – जया॑ ॥ ए॒व । ए॒नम् । प॒शुभि॑रिति प॒शु – भिः ।
 अ॒नति॑दृ॒श्नमि॒त्यन॑ति – दृ॒श्नम् । क॒रो॒ति । 25 (50)

TS 2.6.5.3

–त्यु॒त्तरं॑ ब॒र्हिषः॑ प्र॒स्तर॑ꣳ सा॒दय॑ति प्र॒जा वै ब॒र्हि र्यज॑मानः
 प्र॒स्तरो॑यज॒मान–मे॒वाय॑ज॒माना–दु॒त्तरं॑ क॒रो॒ति तस्मा॑द्–
 यज॑मा॒नोऽय॑ज॒मानादु॒त्तरोऽन्त॑र्दधाति व्यावृ॒त्या अ॒नक्ति॑ ह॒विष्कृ॑तमे॒वैनꣳ
 सु॒वर्गं॑ ँलो॒कं ग॑मयति॒त्रेधाऽन॑क्ति त्रय॑ इ॒मे लो॒का ए॒भ्य ए॒वैनं॑
 ँलो॒केभ्योऽन॑क्ति न प्र॒ति शृ॑णाति॒यत् प्र॒तिशृ॑णीयाद॒नूद्ध्वं॑ भावु॒कं
 यज॑मानस्य स्यादु॒परी॑व प्र॒ हर – [] 26

TS 2.6.5.3 - Padam

उत्तर॑मित्युत् – तर॑म् । ब॒र्हि॑षः । प्र॒स्तर॑मिति प्र – स्तर॑म् ।
सा॒दय॑ति । प्र॒जा इति॑ प्र – जाः । वै । ब॒र्हिः॑ । यज॑मानः ।
प्र॒स्तर॑ इति॑ प्र – स्तरः॑ । यज॑मानम् । ए॒व । अ॒यज॑मानात् ।
उत्तर॑मित्युत् – तर॑म् । क॒रोति॑ । तस्मा॑त् । यज॑मानः । अ॒यज॑मानात् ।
उत्तर॑ इत्युत् – तरः॑ । अ॒न्तः । द॒धाति॑ । व्यावृ॑त्या इति॑ वि-आवृ॑त्यै ।
अ॒नक्ति॑ । ह॒विष्कृ॑तमिति॑ ह॒विः – कृ॒तम् । ए॒व । ए॒नम् । सु॒वर्ग॑मिति॑
सुवः॑ – गम् । लो॒कम् । ग॒मय॑ति । त्रे॒धा । अ॒नक्ति॑ । त्रयः॑ । इ॒मे ।
लो॒काः । ए॒भ्यः । ए॒व । ए॒नम् । लो॒केभ्यः॑ । अ॒नक्ति॑ । न । प्र॒तीति॑ ।
शृ॒णाति॑ । यत् । प्र॒तिशृ॑णीयादिति॑ प्रति – शृ॒णीया॑त् ।
अ॒नू॒र्ध्वं॑ भा॒वुक॑मित्य॒नू॒र्ध्वं॑-भा॒वुक॑म् । यज॑मानस्य । स्या॒त् ।
उ॒परि॑ । इ॒व । प्रेति॑ । ह॒रति॑ । 26 (50)

TS 2.6.5.4

-त्यु॒परी॑व हि सु॒वर्गो॑ लो॒को निय॑च्छति वृ॒ष्टिमे॒वास्मै॑ निय॑च्छति
ना॒त्यग्रं॑ प्र ह॒रेद्य॑दत्यग्रं प्र॒हरे॑द-त्यासा॒रिण्य॑द्ध्व॒र्यो-र्ना॑शु॒का स्या॑न्न
पु॒रस्ता॑त् प्र॒त्यस्ये॑द्यत् पु॒रस्ता॑त् प्र॒त्यस्ये॑थ् सु॒वर्गाल्लो॒काद्-यज॑मानं॑

प्रति॑ नुदे॒त् प्राञ्चं॑ प्र॒हरति॑ यज॒मानमे॒व सु॒वर्गं॑ लो॒कं ग॒मयति॑ न
विष्व॑ञ्चं वि॒ युयाद्-यद्-विष्व॑ञ्चं वि॒युयात् - [] 27

TS 2.6.5.4 - Padam

उपरि॑ । इ॒व । हि । सु॒वर्ग इति॑ सु॒वः - गः । लो॒कः । नीति॑ ।
यच्छति॑ । वृष्टि॑म् । ए॒व । अ॒स्मै । नीति॑ । यच्छति॑ । न ।
अत्य॑ग्र॒मित्यति॑ - अ॒ग्रम् । प्रेति॑ । ह॒रेत् । यत् ।
अत्य॑ग्र॒मित्यति॑ - अ॒ग्रम् । प्र॒हरे॒दिति॑ प्र - ह॒रेत् ।
अ॒त्या॒सा॒रिणीत्यति॑-आ॒सा॒रिणी॑ । अ॒ध्व॒र्योः । नाशु॑का । स्यात् । न ।
पु॒रस्तात् । प्रतीति॑ । अ॒स्येत् । यत् । पु॒रस्तात् । प्र॒त्यस्ये॒दिति॑
प्रति॑ - अ॒स्येत् । सु॒वर्गा॒दिति॑ सु॒वः - गात् । लो॒कात् । यज॑मानम् ।
प्रतीति॑ । नुदे॒त् । प्राञ्च॑म् । प्रेति॑ । ह॒रति॑ । यज॑मानम् । ए॒व ।
सु॒वर्गमिति॑ सु॒वः - गम् । लो॒कम् । ग॒मयति॑ । न । विष्व॑ञ्चम् ।
वीति॑ । यु॒यात् । यत् । विष्व॑ञ्चम् । वि॒युया॒दिति॑ वि-यु॒यात् । 27 (50)

TS 2.6.5.5

स्त्र्य॑स्य जा॒येतो॒र्ध्वमु॒द्यौत्यू॒र्ध्वमि॒व हि पु॒ंसः पु॒माने॒वा॒स्य जा॒यते॑
यथ् स्फ्ये॑न वो॒पवे॒षेण॑ वा यो॒युप्ये॑त स्तृति॑रे॒वा॒स्य सा ह॒स्तेन॑ यो॒युप्ये॑ते

यज॑मानस्य गोपी॒थाय॑ ब्र॒ह्मवा॒दिनो॑ वदन्ति॒ किं य॑ज्ञस्य॒ यज॑मान॒
इति॑ प्र॒स्तर॒ इति॑ तस्य॒ क्व सु॒वर्गो॑ लो॒क इत्या॑हवनीय॒ इति॑ ब्रूया॒द्यत्
प्र॒स्तर॒माह॑वनीये॒ प्र॒हरति॑ यज॑मानमेव – [] 28

TS 2.6.5.5 - Padam

स्त्री । अस्य॑ । जा॒येत॑ । ऊ॒र्ध्वम् । उदि॑ति । यौ॒ति । ऊ॒र्ध्वम् ।
इ॒व । हि । पु॒ंसः । पु॒मान् । ए॒व । अस्य॑ । जा॒यते॑ । यत् । स्प॒येन॑ ।
वा । उ॒प॒वे॒षेणे॑त्युप॒-वे॒षेण॑ । वा । यो॒युप्ये॑त । स्तृ॒तिः । ए॒व । अस्य॑ ।
सा । ह॒स्तेन॑ । यो॒युप्ये॑ते । यज॑मानस्य । गोपी॒थाय॑ । ब्र॒ह्मवा॒दिन॑
इति॑ ब्र॒ह्म – वा॒दिनः॑ । वद॑न्ति । किम् । य॑ज्ञस्य॒ यज॑मानः । इति॑ ।
प्र॒स्तर॒ इति॑ प्र॒-स्तरः॑ । इति॑ । तस्य॑ । क्व । सु॒वर्ग इति॑ सुवः॒- गः ।
लो॒कः । इति॑ । आ॒ह॒वनी॑य इत्या॒ – ह॒वनी॑यः । इति॑ । ब्रू॒यात् । यत् ।
प्र॒स्तर॒मिति॑ प्र – स्तर॒म् । आ॒ह॒वनी॑य इत्या॒ – ह॒वनी॑ये॒ ।
प्र॒हर॒तीति॑ प्र – हर॑ति । यज॑मानम् । ए॒व । 28 (50)

TS 2.6.5.6

सु॒वर्गं लो॒कं ग॑मयति॒ वि वा ए॒तद्-य॑जमानो लि॒शते॑ यत् प्र॒स्तरं॑
यो॒युप्यन्ते॑ ब॒र्हि॒रनु॑ प्र॒हरति॑ शान्त्या॒ अनार॑म्भण॒ इ॒व वा ए॒तर्ह्य॑र्ध्व॒र्युः

स ई॒श्व॒रो वे॒प॒नो भ॒वितो॑र्ध्रु॒वा ऽसी॒तीमा॒मभि॒ मृ॒शती॒यं वै
 ध्रु॒वाऽस्यामे॒व प्र॒ति॒ति॒ष्ठति॒ न वे॒प॒नो भ॒वत्य॒गा(३)न॒ग्नीदि॒त्याह
 यद्ब्रू॒याद्-ग॒न्नाग्निरि॒त्य () -ग॒नाव॒ग्निं ग॒मये॒न्नि र्य॒जमा॒नं
 सु॒वर्गा॒ल्लो॒काद्-भ॒जेद॒ग॒न्नित्ये॒व ब्रू॒याद्-य॒जमा॒नमे॒व सु॒वर्गं
 लो॒कं ग॒मय॒ति ॥ 29

TS 2.6.5.6 - Padam

सु॒वर्गमि॒ति सु॒वः - ग॒म् । लो॒कम् । ग॒मय॒ति । वी॒ति । वै । ए॒तत् ।
 य॒जमा॒नः । लि॒श॒ते । यत् । प्र॒स्तर॒मि॒ति प्र - स्त॒रम् । यो॒यु॒प्यन्ते॑ ।
 ब॒र्हिः । अ॒नु । प्रे॒ति । ह॒रति॒ । शान्त्यै॑ । अ॒ना॒रं॒भण
 इ॒त्यना - रं॒भणः । इ॒व । वै । ए॒तर्हि॑ । अ॒ध्व॒र्युः । सः । ई॒श्वरः ।
 वे॒प॒नः । भ॒वि॒तोः । ध्रु॒वा । अ॒सि । इ॒ति । इ॒माम् । अ॒भी॒ति ।
 मृ॒शति॒ । इ॒यम् । वै । ध्रु॒वा । अ॒स्याम् । ए॒व । प्र॒ती॒ति । ति॒ष्ठति॒ । न ।
 वे॒प॒नः । भ॒वति॒ । अ॒गा(३)न् । अ॒ग्नी॒दि॒त्यग्नि॑ - इ॒त् । इ॒ति । आ॒ह ।
 यत् । ब्रू॒यात् । अ॒गन् । अ॒ग्निः । इ॒ति () । अ॒ग्नौ ।
 अ॒ग्निम् । ग॒मये॒त् । नि॒रिति॑ । य॒जमा॒नम् । सु॒वर्गा॒दि॒ति सु॒वः-गा॒त् ।

लो॒कात् । भ॒जे॒त् । अ॒ग॒न् । इति॑ । ए॒व । ब्रू॒या॒त् । य॒ज॒मा॒नम् । ए॒व ।

सु॒व॒र्ग॒मि॒ति॑ सु॒वः॑ – ग॒म् । लो॒कम् । ग॒म॒य॒ति॑ ॥ 29 (67)

(आ॒सा॒द्य प्रा॑ – न॒ति॒दृ॒श॒नं॑ करो॒ति॑ – ह॒रति॑ – वि॒यु॒याद् –
य॒ज॒मा॒न॒मे॒वा-ऽग्नि॑रि॒ति॑ – स॒प्त॒द॒श च॑) (A5)

TS 2.6.6.1

अ॒ग्ने॒स्त्रयो॑ ज्या॒या॒ऽसो॑ भ्रा॒तर॑ आ॒सन् ते॑ दे॒वेभ्यो॑ ह॒व्यं व॑ह॒न्तः
प्रा॒मी॒यन्त॑ सो॒ऽग्नि॑र॒भि॒भे॒दित्थं॑ वा॒व स्य॑ आ॒र्ति॒मा॒रि॒ष्य॒तीति॑ स
नि॒ला॒य॒त सो॒ऽपः॑ प्रा॒वि॒श॒त् तं दे॒वताः॑ प्रै॒षमै॑च्छन् तं म॒थ्स्यः॑ प्रा॒ब्रवी॑त्
तम॑श॒प॒द्धि॒या॒धि॒या त्वा व॑द्ध्य॒यासु॒र्यो मा॒ प्रावो॑च॒ इति॑ तस्मा॒न्म॒थ्स्यं॑
धि॒या॒धि॒या घ्न॑न्ति श॒प्तो – [] 30

TS 2.6.6.1 - Padam

अ॒ग्नेः । त्र॒यः । ज्या॒या॒ऽसः॑ । भ्रा॒तरः॑ । आ॒सन् । ते । दे॒वेभ्यः॑ ।
ह॒व्यम् । व॑ह॒न्तः । प्रेति॑ । अ॒मी॒यन्त॑ । सः । अ॒ग्निः । अ॒भि॒भे॒त् ।
इ॒त्थम् । वा॒व । स्यः॑ । आ॒र्ति॒म् । एति॑ । अ॒रि॒ष्य॒ति॑ । इति॑ । सः ।
नि॒ला॒य॒त । सः । अ॒पः । प्रेति॑ । अ॒वि॒श॒त् । तम् । दे॒वताः॑ ।
प्रै॒षमि॑ति प्र – ए॒षम् । ऐ॒च्छन् । तम् । म॒थ्स्यः॑ । प्रेति॑ । अ॒ब्रवी॑त् ।

तम् । अ॒श॒पत् । धि॒या॒धि॒येति॑ धि॒या-धि॒या । त्वा । व॒द्ध्य॒या॒सुः । यः ।

मा । प्रेति॑ । अ॒वो॒चः । इति॑ । तस्मा॑त् । म॒थ्स्य॑म् ।

धि॒या॒धि॒येति॑ धि॒या - धि॒या । घ्न॒न्ति । श॒प्तः । 30 (50)

TS 2.6.6.2

हि तम॑न्ववि॒न्दन् तम॑ ब्रुव॒न्नुप॑ न आ॒ वर्त॑स्व ह॒व्यं नो॑ व॒हेति॑
सोऽब्र॑वी॒द्वरं॑ वृ॒णै यदे॒व गृ॒हीत॑स्याहु॒तस्य॑ ब॒हिःप॑रि॒धि स्क्व॑न्दात् तन्मे॒
भ्रातृ॑णां भा॒गधे॑यम॒सदिति॑ तस्मा॑द्यद् गृ॒हीत॑स्याहु॒तस्य॑ ब॒हिःप॑रि॒धि
स्क्व॑न्दति॒ तेषां॑ तद्-भा॒गधे॑यं ता॒नेव॑ तेन॒ प्री॑णाति॒ परि॒धीन् परि॑ दधाति॒
रक्ष॑साम॒पहत्यै॑ स॒ ऽस्पर्श॑यति॒ - [] 31

TS 2.6.6.2 - Padam

हि । तम् । अ॒न्विति॑ । अ॒वि॒न्दन् । तम् । अ॒ब्रुव॑न् । उ॒पेति॑ । नः ।
एति॑ । वर्त॑स्व । ह॒व्यम् । नः । व॒ह । इति॑ । सः । अ॒ब्रवी॑त् । वर॑म् ।
वृ॒णै । यत् । ए॒व । गृ॒हीत॑स्य । अ॒हुत॑स्य । ब॒हिःप॑रि॒धीति॑
ब॒हिः - प॑रि॒धि । स्क्व॑न्दात् । तत् । मे॒ । भ्रातृ॑णाम् ।
भा॒गधे॑यमिति॑ भा॒ग - धे॑यम् । अ॒सत् । इति॑ । तस्मा॑त् । यत् ।
गृ॒हीत॑स्य । अ॒हुत॑स्य । ब॒हिःप॑रि॒धीति॑ ब॒हिः - प॑रि॒धि । स्क्व॑न्दति ।

तेषाम् । तत् । भा॒ग॒धे॒य॒मि॒ति॒ भा॒ग – धे॒यम् । तान् । ए॒व । ते॒न ।
 प्री॒णा॒ति॒ । परि॒धी॒नि॒ति॒ परि – धी॒न् । परी॒ति॒ । द॒धा॒ति॒ । रक्ष॑साम् ।
 अप॒ह॒त्या॒ इत्य॑प – ह॒त्यै । स॒मि॒ति॒ । स्पर्श॑यति । 31 (50)

TS 2.6.6.3

रक्ष॑साम॒नन्व॑व॒चा॒राय॒ न पु॒रस्ता॑त् परि॑ द॒धा॒त्यादि॒त्यो ह्ये॒वोद्यन् पु॒रस्ता॑द्-
 रक्षा॑स्य॒प॒ह॒न्त्यू॒र्ध्वे स॒मि॒धा॒वा द॒धा॒त्युपरि॑ष्ठादे॒व रक्षा॑स्य॒प॒ ह॒न्ति॒
 य॒जुषा॑ऽन्यां तू॒ष्णी॒म॒न्यां मि॒थु॒न॒त्वाय॒ द्वे आ द॒धा॒ति॒ द्वि॒पाद्-य॒ज॒मानः॑
 प्र॒ति॒ष्ठि॒त्यै ब्र॒ह्म॒वादि॒नो व॒द॒न्ति॒ स त्वै य॒जेत॒ यो य॒ज्ञस्याऽऽर्त्या॑ व॒सी॒य॒न्थ्
 स्या॒दि॒ति॒ भू॒प॒तये॒ स्वाहा॒ भुव॑न॒प॒तये॒ स्वाहा॒ भू॒तानां॑ – [] 32

TS 2.6.6.3 - Padam

रक्ष॑साम् । अ॒न॒न्व॑व॒चा॒रा॒येत्य॑न॒नु – अ॒व॒चा॒रा॒य । न । पु॒रस्ता॑त् ।
 परी॒ति॒ । द॒धा॒ति॒ । आ॒दि॒त्यः । हि । ए॒व । उ॒द्य॒न्नित्यु॑त् – य॒न् ।
 पु॒रस्ता॑त् । रक्षा॑सि । अ॒प॒ह॒न्तीत्य॑प – ह॒न्ति॒ । ऊ॒र्ध्वे इति॑ ।
 स॒मि॒धा॒वि॒ति॒ सं – इ॒धौ । ए॒ति॒ । द॒धा॒ति॒ । उ॒परि॑ष्ठात् । ए॒व ।
 रक्षा॑सि । अ॒पे॒ति॒ । ह॒न्ति॒ । य॒जुषा॑ । अ॒न्याम् । तू॒ष्णीम् । अ॒न्याम् ।
 मि॒थु॒न॒त्वाये॑ति॒ मि॒थु॒न – त्वा॒य । द्वे इति॑ । ए॒ति॒ । द॒धा॒ति॒ ।

द्वि॒पादि॑ति द्वि – पात् । यज॑मानः । प्रति॑ष्ठित्या इति॑ प्रति – स्थि॒त्यै ।
 ब्र॒ह्म॒वादि॑न इति॑ ब्रह्म – वा॒दिनः॑ । वद॑न्ति । सः । तु । वै । यजे॑त ।
 यः । य॒ज्ञस्य॑ । आ॒र्त्या । वसी॑यान् । स्यात् । इति॑ । भू॒पत॑य
 इति॑ भू – पत॑ये । स्वाहा॑ । भुव॑नपतय इति॑ भुव॑न – पत॑ये ।
 स्वाहा॑ । भू॒ताना॑म् । 32 (50)

TS 2.6.6.4

पत॑ये स्वाहे॑ति स्क्व॒न्नम॑नु मन्त्र॑येत य॒ज्ञस्यै॑व तदा॒र्त्या यज॑मानो
 वसी॑यान् भव॑ति भू॒यसी॑र्हि दे॒वताः॑ प्री॒णाति॑ जा॒मि वा ए॒तद्-य॒ज्ञस्य॑
 क्रि॒यते॑ यद॒न्वञ्चौ॑ पु॒रोडा॑शा वुपा॑ञ्शुयाजमन्तरा यज॑त्यजा॒मित्वा॒याथो॑
 मिथु॑नत्वाया॒ग्निर॒मुष्मि॑न् लो॒क आसी॑द्-य॒मोऽस्मि॑न् ते दे॒वा
 अब्रु॑वन्नेते॒मौ वि पर्यू॑हामेत्यन्नाद्येन दे॒वा अ॒ग्नि – [] 33

TS 2.6.6.4 - Padam

पत॑ये । स्वाहा॑ । इति॑ । स्क्व॒न्नम् । अ॒न्विति॑ । मन्त्र॑येत । य॒ज्ञस्य॑ ।
 ए॒व । तत् । आ॒र्त्या । यज॑मानः । वसी॑यान् । भव॑ति । भू॒यसीः॑ ।
 हि । दे॒वताः॑ । प्री॒णाति॑ । जा॒मि । वै । ए॒तत् । य॒ज्ञस्य॑ । क्रि॒यते॑ ।
 यत् । अ॒न्वञ्चौ॑ । पु॒रोडा॑शौ । उपा॑ञ्शुयाजमित्युपा॑ञ्शु-याजम् ।

अ॒न्तरा॑ । य॒जति॑ । अ॒जामि॒त्वायेत्य॑जामि – त्वा॒य । अथो॑ इति॑ ।
मि॒थुन॒त्वायेति॑ मिथु॒न – त्वा॒य । अ॒ग्निः । अ॒मुष्मिन् । लो॒के ।
आसी॑त् । य॒मः । अ॒स्मिन् । ते । दे॒वाः । अ॒ब्रुवन् । एति॑ । इ॒त ।
इ॒मौ । वि । प॒रीति॑ । ऊ॒हाम॑ । इति॑ । अ॒न्नाद्ये॒नेत्य॑न्न – अ॒द्येन॑ ।
दे॒वाः । अ॒ग्निम् । 33 (50)

TS 2.6.6.5

–मु॒पाम॑न्त्रयन्त॒ राज्ये॑न पि॒तरो॑ य॒मं तस्मा॑द॒ग्नि दे॒वाना॑म॒न्नादो॑ य॒मः
पि॒तृणां॑ राजा॒ य ए॒वं वे॒द प्र रा॒ज्यम॑न्नाद्य॒माप्नो॑ति तस्मा॑ ए॒तद्–
भा॒ग॒धेयं॑ प्राय॑च्छन् यद॒ग्नये॑ स्विष्ट॒कृते॑ ऽव॒द्यन्ति॑ यद॒ग्नये॑ स्विष्ट॒कृते॑
ऽव॒द्यति॑ भा॒ग॒धेये॑नै॒व तद्–रु॒द्रः स॑म॒र्द्धय॑ति स॒कृत् स॑कृ॒दव॑ द्यति
स॒कृदि॒व हि रु॒द्र उ॑त्त॒रा॒र्धाद॑व द्यत्ये॒षा वै रु॒द्रस्य॑ – [] 34

TS 2.6.6.5 - Padam

उ॒पाम॑न्त्रयन्तेत्युप–अमन्त्रयन्त । रा॒ज्येन॑ । पि॒तरः॑ । य॒मम् । तस्मा॑त् ।
अ॒ग्निः । दे॒वाना॑म् । अ॒न्नाद॑ इत्य॒न्न – अ॒दः । य॒मः । पि॒तृणा॑म् ।
राजा॑ । यः । ए॒वम् । वे॒द । प्रेति॑ । रा॒ज्यम् । अ॒न्नाद्य॑मित्य॒न्न–अ॒द्यम् ।
आ॒प्नोति॑ । तस्मै॑ । ए॒तत् । भा॒ग॒धेय॑मिति॑ भा॒ग – धेय॑म् । प्रेति॑ ।

अ॒य॒च्छन् । यत् । अ॒ग्नये॑ । स्वि॒ष्टकृ॑त् इति स्विष्ट – कृ॑ते ।
 अ॒व॒द्यन्ती॑त्यव – द्यन्ति॑ । यत् । अ॒ग्नये॑ । स्वि॒ष्टकृ॑त् इति
 स्विष्ट – कृ॑ते । अ॒व॒द्यती॑त्यव – द्यति॑ । भा॒ग॒धेये॑नेति भा॒ग॒धेये॑न ।
 ए॒व । तत् । रु॒द्रम् । स॒मिति॑ । अ॒र्ध॒यति॑ ।
 स॒कृ॒त्स॒कृ॒दिति॑ स॒कृ॒त् – स॒कृ॒त् । अ॒वेति॑ । द्यति॑ । स॒कृ॒त् । इ॒व ।
 हि । रु॒द्रः । उ॒त्तरा॑र्धादित्यु॒त्तर – अ॒र्धात् । अ॒वेति॑ । द्यति॑ । ए॒षा ।
 वै । रु॒द्रस्य॑ । 34 (50)

TS 2.6.6.6

दि॒क् स्वा॒यामे॒व दि॒शि रु॒द्रं नि॒रव॑दयते द्वि॒रभि॑ घा॒रयति॑
 चतु॒रव॑त्तस्याऽऽप॒त्यै प॒शवो॑ वै पूर्वा॑ आहु॒तय॑ ए॒ष रु॒द्रो यद॑ग्निर्यत्
 पूर्वा॑ आहु॒तीर॑भि जुहु॒याद्-रु॒द्राय॑ प॒शून॑पि द॒ध्याद॑प॒शुर्य॑ज॒मानः॑
 स्याद॑तिहाय पूर्वा॑ आहु॒तीर्जु॑होति प॒शूनां॑ गो॒पीथा॑य ॥ 35

TS 2.6.6.6 - Padam

दिक् । स्वा॒याम् । ए॒व । दि॒शि । रु॒द्रम् ।
 नि॒रव॑दयत इति निः-अ॒व॑दयते । द्विः । अ॒भीति॑ । घा॒रयति॑ ।
 चतु॒रव॑त्तस्येति चतुः – अ॒व॑त्तस्य । आ॒प॒त्यै । प॒शवः॑ । वै । पूर्वाः॑ ।

आहु॑तय॒ इत्या – हु॒तयः॑ । ए॒षः । रु॒द्रः । यत् । अ॒ग्निः । यत् ।
 पूर्वाः॑ । आहु॑तीरित्या – हु॒तीः । अ॒भीति॑ । जुहु॑यात् । रु॒द्राय॑ ।
 प॒शून् । अपी॑ति । द॒द्ध्यात् । अ॒पशुः॑ । यज॑मानः । स्यात् ।
 अ॒तिहा॑येत्यति – हा॒य । पूर्वाः॑ । आहु॑तीरित्या – हु॒तीः । जुहो॑ति ।
 प॒शूनाम् । गो॒पीथा॑य ॥ 35 (37) (श॒प्तः – स्पर्श॑यति – भू॒ताना॑ –
 म॒ग्निꣳ – रु॒द्रस्य॑ – स॒प्तत्रिंश॑च्च) (A6)

TS 2.6.7.1

मनुः॑ पृथि॒व्या य॒ज्ञिय॑मैच्छत् स घृ॒तं निषि॑क्तमविन्दत् सोऽब्र॑वीत्
 कोऽस्ये॑श्वरो य॒ज्ञेऽपि॑ कर्तो॒रिति॑ ताव॑ब्रूतां मि॒त्रावरु॑णौ गो॒रेवाऽऽवमी॑श्वरौ
 कर्तोः॑ स्व इति॒ तौ ततो॑ गाꣳ स॒मैरय॑ताꣳ सा यत्र॑यत्र न्यक्रा॑मत्
 ततो॑ घृ॒तमपी॑ड्यत तस्माद्-घृ॒तप॑द्युच्यते तदस्यै
 जन्मो॑पहूतꣳ रथ॑न्तरꣳ सह पृथि॒व्येत्या॑हे – [] 36

TS 2.6.7.1 - Padam

मनुः॑ । पृथि॒व्याः । य॒ज्ञिय॑म् । ऐच्छत् । सः । घृ॒तम् । निषि॑क्तमिति
 नि – सि॒क्तम् । अ॒विन्दत् । सः । अ॒ब्रवीत् । कः । अ॒स्य । ई॒श्वरः॑ ।

य॒ज्ञे । अ॒पी॒ति॒ । क॒र्तोः॑ । इति॑ । तौ । अ॒ब्रू॒ताम् । मि॒त्रा॒वरु॒णा॒वि॒ति॒

मि॒त्रा – वरु॒णौ । गोः । ए॒व । आ॒वम् । ई॒श्व॒रौ । क॒र्तोः॑ । स्वः ।

इति॑ । तौ । ततः॑ । गा॒म् । स॒मि॒ति॒ । ऐ॒र॒य॒ताम् । सा ।

य॒त्र॒य॒त्रे॒ति॒ य॒त्र – य॒त्र । न्य॒क्राम॑दि॒ति॒ नि – अ॒क्राम॑त् । ततः॑ ।

घृ॒तम् । अ॒पी॒ड्य॑त् । तस्मा॑त् । घृ॒त॒प॒दी॒ति॒ घृ॒त – प॒दी । उ॒च्य॑ते ।

तत् । अ॒स्यै॑ । ज॒न्म । उ॒प॒हू॒त॒मि॒त्यु॒प – हू॒तम् ।

र॒थ॒न्त॒र॒मि॒ति॒ र॒थं – त॒रम् । स॒ह । पृ॒थि॒व्या । इति॑ । आ॒ह । 36 (50)

TS 2.6.7.2

–यं॑ वै र॒थ॒न्त॒र॒मि॒मा॒मे॒व स॒हा॒न्ना॒द्–ये॒नो॒प ह्व॑य॒त उ॒प॒हू॒तं॑ वा॒म॒दे॒व्य॑

स॒हा॒न्त॒रि॒क्षे॒णे॒त्या॒ह प॒श॒वो॒ वै वा॒म॒दे॒व्यं प॒शू॒ने॒व स॒हा॒न्त॒रि॒क्षे॒णो॒प ह्व॑य॒त

उ॒प॒हू॒तं बृ॒ह॒थ् स॒ह दि॒वे॒त्या॒है॒रं॑ वै बृ॒ह॒दि॒रा॒मे॒व स॒ह दि॒वो॒प ह्व॑य॒त

उ॒प॒हू॒ताः स॒प्त हो॒त्रा इ॒त्या॒ह हो॒त्रा ए॒वो॒प ह्व॑य॒त उ॒प॒हू॒ता धे॒नुः–[] 37

TS 2.6.7.2 - Padam

इ॒यम् । वै । र॒थ॒न्त॒र॒मि॒ति॒ र॒थं – त॒रम् । इ॒मा॒म् । ए॒व । स॒ह ।

अ॒न्ना॒द्ये॒ने॒त्य॒न्न – अ॒द्ये॒न । उ॒पे॒ति॒ । ह्व॑य॒ते । उ॒प॒हू॒त॒मि॒त्यु॒प – हू॒तम् ।

वा॒म॒दे॒व्य॒मि॒ति॒ वा॒म – दे॒व्य॒म् । स॒ह । अ॒न्त॒रि॒क्षे॒ण । इति॑ । आ॒ह ।

प॒शवः॑ । वै । वा॒म॒दे॒व्यमि॑ति वा॒म – दे॒व्यम् । प॒शून् । ए॒व । स॒ह ।
 अ॒न्तरि॑क्षेण । उ॒पेति॑ । ह॒य॒ते । उ॒प॒हू॒तमि॑त्युप॒-हू॒तम् । बृ॒हत् । स॒ह ।
 दि॒वा । इति॑ । आ॒ह । ऐ॒रम् । वै । बृ॒हत् । इ॒राम् । ए॒व । स॒ह ।
 दि॒वा । उ॒पेति॑ । ह॒य॒ते । उ॒प॒हू॒ता इ॑त्युप॒-हू॒ताः । स॒प्त । हो॒त्राः॑ ।
 इति॑ । आ॒ह । हो॒त्राः॑ । ए॒व । उ॒पेति॑ । ह॒य॒ते । उ॒प॒हू॒तेत्युप॑-हू॒ता ।

धे॒नुः । 37 (50)

TS 2.6.7.3

स॒हर्ष॑भे॒त्याह॑ मि॒थु॒नमे॒वोप॑ ह॒य॒त उ॒प॒हू॒तो भ॒क्षः स॒खेत्या॑ह
 सोम॑पी॒थमे॒वोप॑ ह॒य॒त उ॒प॒हू॒ताँ(४) हो॑ इ॒त्याहाऽऽत्मा॑नमे॒वोप॑ ह॒य॒त
 आ॒त्मा ह्यु॑प॒हू॒तानां॑ व॒सिष्ठ॑ इ॒डामु॑प॒ ह॒य॒ते प॒शवो॑ वा इ॒डा प॒शूने॒वोप॑
 ह॒य॒ते च॒तु॒रुप॑ ह॒य॒ते च॒तु॒ष्पादो॑ हि प॒शवो॑ मा॒नवी॑त्याह

म॒नु॒र्ह्येता॑- [] 38

TS 2.6.7.3 - Padam

स॒हर्ष॑भे॒ति स॒ह-ऋ॒षभा॑ । इति॑ । आ॒ह । मि॒थु॒नम् । ए॒व । उ॒पेति॑ ।
 ह॒य॒ते । उ॒प॒हू॒त इ॑त्युप॒-हू॒तः । भ॒क्षः । स॒खा । इति॑ । आ॒ह ।
 सोम॑पी॒थमि॑ति सोम – पी॒थम् । ए॒व । उ॒पेति॑ । ह॒य॒ते ।

उप॒हू॒ताँ(४) इत्युप॑ – हू॒ता(३)ँ॑ । हो॑ इति॑ । इति॑ । आ॒ह ।
 आ॒त्मा॒नम्॑ । ए॒व । उपेति॑ । ह॒य॒ते॑ । आ॒त्मा । हि॑ ।
 उप॒हू॒ताना॒मित्युप॑ – हू॒ताना॒म् । वसिष्ठः॑ । इडा॒म् । उपेति॑ । ह॒य॒ते॑ ।
 प॒शवः॑ । वै । इडा॑ । प॒शून् । ए॒व । उपेति॑ । ह॒य॒ते॑ । च॒तुः । उपेति॑ ।
 ह॒य॒ते॑ । च॒तुष्पाद॑ इति॑ च॒तुः-पादः॑ । हि॑ । प॒शवः॑ । मा॒न॒वी । इति॑ ।
 आ॒ह । मनुः॑ । हि॑ । ए॒ताम् । 38 (50)

TS 2.6.7.4

-म॒ग्रे ऽप॒श्यद्-घृ॒तप॒दीत्या॑ह॒ य दे॒वास्यै॑ प॒दाद्-घृ॒तमपी॑ड्य॒त
 तस्मा॑दे॒वमा॑ह॒ मैत्रा॑व॒रुणी॒त्याह॑ मि॒त्राव॑रु॒णौ ह्ये॒नाꣳ स॒मैर॑य॒तां
 ब्र॒ह्म दे॒वकृ॑त-मु॒पहू॑त॒मित्या॑ह॒ ब्रह्मै॒वोप॑ ह॒य॒ते॑ दै॒व्या अ॒ध्व॒र्य॒व
 उप॒हू॒ता उप॒हू॒ता मनु॑ष्या इत्या॑ह॒ दे॒वमनु॑ष्या॒नेवोप॑ ह॒य॒ते॑ य इ॒मं
 य॒ज्ञम॒वा॒न् ये य॒ज्ञप॑तिं॒ व॒र्धा॒नित्या॑ह॒ – [] 39

TS 2.6.7.4 - Padam

अ॒ग्रे । अ॒प॒श्यत् । घृ॒तप॒दीति॑ घृ॒त-प॒दी । इति॑ । आ॒ह । यत् । ए॒व ।
 अ॒स्यै॑ । प॒दात् । घृ॒तम् । अ॒पी॒ड्य॒त । तस्मा॑त् । ए॒वम् । आ॒ह ।
 मै॒त्रा॒व॒रु॒णीति॑ मै॒त्रा – व॒रु॒णी । इति॑ । आ॒ह ।

मि॒त्रावरु॑णा॒विति॑ मि॒त्रा – वरु॑णौ । हि । ए॒नाम् ।
स॒मैर॑यता॒मिति॑ सं – ऐ॒रयता॑म् । ब्र॒ह्म । दे॒वकृ॑त॒मिति॑ दे॒व – कृ॒तम् ।
उप॑हू॒तमित्यु॑प – हू॒तम् । इति॑ । आ॒ह । ब्र॒ह्म । ए॒व । उपे॑ति । ह॒य॒ते ।
दै॒व्याः । अ॒ध्व॒र्य॒वः । उप॑हू॒ता इत्यु॑प – हू॒ताः । उप॑हू॒ता
इत्यु॑प – हू॒ताः । म॒नु॒ष्याः । इति॑ । आ॒ह । दे॒वम॒नु॒ष्यानि॑ति
दे॒व-म॒नु॒ष्यान् । ए॒व । उपे॑ति । ह॒य॒ते । ये । इ॒मम् । य॒ज्ञम् । अ॒वान् ।
ये । य॒ज्ञप॑ति॒मिति॑ य॒ज्ञ – प॒तिम् । व॒र्धा॒न् । इति॑ । आ॒ह । 39 (50)

TS 2.6.7.5

य॒ज्ञाय॑ चै॒व यज॑मा॒नाय॑ च॒ ऽऽशि॑ष॒मा शा॒स्ते उप॑हू॒ते द्या॒वापृ॑थि॒वी
इत्या॑ह द्या॒वापृ॑थि॒वी ए॒वोप॑ ह॒य॒ते पू॒र्व॒जे ऋ॒ताव॑री इत्या॑ह पू॒र्व॒जे ह्ये॑ते
ऋ॒ताव॑री दे॒वी दे॒वपु॑त्रे इत्या॑ह दे॒वी ह्ये॑ते दे॒वपु॑त्रे उप॑हू॒तोऽयं
य॒ज॒मा॒न इत्या॑ह यज॑मा॒नमे॒वोप॑ ह॒य॒त उत्तर॑स्यां दे॒वय॒ज्याया॑मुप॑हू॒तो
भू॒य॒सि ह॒विष्क॑रण॒ उप॑हू॒तो दि॒व्ये धा॒मन्नु॑प॒हूत॑ – [] 40

TS 2.6.7.5 - Padam

य॒ज्ञाय॑ । च॒ । ए॒व । यज॑मा॒नाय॑ । च॒ । आ॒शि॒ष॒मि॒त्या-शि॑ष॒म् । ए॒ति॑ ।
शा॒स्ते । उप॑हू॒ते इत्यु॑प – हू॒ते । द्या॒वापृ॑थि॒वी इति॑ द्या॒वा – पृ॑थि॒वी ।

इति । आ॒ह । द्या॒वापृ॒थि॒वी इति॑ द्या॒वा – पृ॒थि॒वी । ए॒व । उ॒पेति॑ ।
ह॒य॒ते । पू॒र्व॒जे इति॑ पू॒र्व – जे । ऋ॒ता॒व॒री इत्यृ॒त – व॒री । इति॑ ।
आ॒ह । पू॒र्व॒जे इति॑ पू॒र्व – जे । हि । ए॒ते इति॑ । ऋ॒ता॒व॒री
इत्यृ॒त – व॒री । दे॒वी इति॑ । दे॒वपु॒त्रे इति॑ दे॒व – पु॒त्रे । इति॑ । आ॒ह ।
दे॒वी इति॑ । हि । ए॒ते इति॑ । दे॒वपु॒त्रे इति॑ दे॒व – पु॒त्रे । उ॒प॒हू॒त
इत्यु॒प॒हू॒तः । अ॒य॒म् । य॒ज॒मा॒नः । इति॑ । आ॒ह । य॒ज॒मा॒न॒म् । ए॒व ।
उ॒पेति॑ । ह॒य॒ते । उ॒त्त॒र॒स्या॒मि॒त्यु॒त् – त॒र॒स्या॒म् ।
दे॒व॒य॒ज्या॒या॒मि॒ति दे॒व – य॒ज्या॒या॒म् । उ॒प॒हू॒त इत्यु॒प – हू॒तः ।
भू॒य॒सि । ह॒वि॒ष्क॒रण॒ इति॑ ह॒विः – क॒रणे॑ । उ॒प॒हू॒त इत्यु॒प – हू॒तः ।
दि॒व्ये । धा॒म॒न् । उ॒प॒हू॒त इत्यु॒प – हू॒तः । 40 (50)

TS 2.6.7.6

इ॒त्या॒ह प्र॒जा वा उ॒त्त॒रा दे॒व॒य॒ज्या प॒श॒वो भू॒यो ह॒वि॒ष्क॒रण॑ सु॒व॒र्गो
लो॒को दि॒व्यं धा॒मे॒द॒म॒सी॒द॒म॒सी॒त्ये॒व य॒ज्ञ॒स्य॑ प्रि॒यं धा॒मो॒प ह॒य॒ते
वि॒श्व॒म॒स्य॑ प्रि॒य॒मु॒प॒हू॒त॒मि॒त्या॒हा॒छं॒ब॒ट्का॒रमे॒वो॒प ह॒य॒ते ॥ 41

TS 2.6.7.6 - Padam

इति॑ । आ॒ह । प्र॒जेति॑ प्र – जा । वै । उत्तरे॑त्युत् – त॒रा । दे॒वय॑ज्येति॑
 दे॒व – य॒ज्या । प॒शवः॑ । भू॒यः । ह॒विष्क॑रणमि॒ति ह॒विः – क॑रणम् ।
 सु॒वर्ग इति॑ सु॒वः-गः । लो॒कः । दि॒व्यम् । धा॒म । इ॒दम् । अ॒सि ।
 इ॒दम् । अ॒सि । इति॑ । ए॒व । य॒ज्ञस्य॑ । प्रि॒यम् । धा॒म । उपेति॑ ।
 ह॒व॒य॒ते । वि॒श्वम् । अ॒स्य । प्रि॒यम् । उप॑हू॒तमि॒त्युप॑ – हू॒तम् । इति॑ ।
 आ॒ह । अ॒छं॒बट्कार॑मि॒त्य॒छं॒बट् – का॒रम् । ए॒व । उपेति॑ ।

ह॒व॒य॒ते ॥ 41 (34) (आ॒ह – धे॒नु- रेतां॑ – वै॒र्धानि॑त्याह –
 धा॒मन्नुप॑हू॒त – श्व॑तु॒स्त्रिंश॑च्च) (A7)

TS 2.6.8.1

प॒शवो॑ वा इ॒डा स्व॑यमा द॒त्ते का॒ममे॒वाऽऽत्म॑ना प॒शूना॑मा द॒त्ते न ह्य॑न्यः
 का॒मं प॒शूनां॑ प्र॒यच्छ॑ति वा॒चस्प॑तये त्वा हु॒तं प्रा॑श्नामीत्याह वा॒चमे॒व
 भा॒ग॒धेये॑न प्रीणाति सद॑सस्प॒तये॑ त्वा हु॒तं प्रा॑श्नामीत्याह स्व॒गाकृ॑त्यै
 चतु॑र॒वत्तं॑ भ॒वति॑ ह॒विर्वै चतु॑र॒वत्तं॑ प॒शवश्च॑तु॒र॒वत्तं॑ य॒द्धोता॑

प्रा॒श्नीया॑द्धोता – [] 42

TS 2.6.8.1 - Padam

प॒शवः॑ । वै । इ॒डा । स्व॒यम् । ए॒ति । द॒त्ते॑ । का॒मम् । ए॒व ।
आ॒त्मना॑ । प॒शूनाम् । ए॒ति । द॒त्ते॑ । न । हि । अ॒न्यः । का॒मम् ।
प॒शूनाम् । प्र॒यच्छ॑तीति॒ प्र – यच्छ॑ति । वा॒चः । प॒तये॑ । त्वा । हु॒तम् ।
प्रे॒ति । अ॒श्ना॒मि । इ॒ति । आ॒ह । वा॒चम् । ए॒व । भा॒गधे॒येने॑ति॒
भा॒ग – धे॒येन॑ । प्री॒णा॒ति । स॒दसः॑ । प॒तये॑ । त्वा । हु॒तम् । प्रे॒ति ।
अ॒श्ना॒मि । इ॒ति । आ॒ह । स्व॒गाकृ॑त्या इ॒ति स्व॒गा – कृ॒त्यै ।
च॒तुर॒वत्त॑मि॒ति च॒तुः – अ॒वत्त॑म् । भ॒वति॑ । ह॒विः । वै ।
च॒तुर॒वत्त॑मि॒ति च॒तुः – अ॒वत्त॑म् । प॒शवः॑ ।
च॒तुर॒वत्त॑मि॒ति च॒तुः – अ॒वत्त॑म् । यत् । हो॒ता ।
प्रा॒श्नी॒यादि॑ति॒ प्र – अ॒श्नि॒यात् । हो॒ता । 42 (50)

TS 2.6.8.2

ऽऽ॒र्ति॒मा॒र्च्छे॒द्-य॒द॒ग्नौ जु॑हु॒याद्-रु॒द्राय॑ प॒शून॑पि द॒द्ध्या॑द॒पशु॑र्य॒ज॒मानः॑
स्या॑द्-वा॒चस्प॑तये॒ त्वा हु॑तं प्रा॒श्ना॒मीत्या॑ह॒ परो॑क्ष॒मेवैन॑-ज्जु॒होति॑
स॒दस॑स्प॒तये॒ त्वा हु॑तं प्रा॒श्ना॒मीत्या॑ह॒ स्व॒गाकृ॑त्यै प्रा॒श्न॒न्ति ती॒र्थ ए॒व

प्रा॒श्न॒न्ति दक्षि॑णां द॒दाति ती॒र्थ ए॒व दक्षि॑णां द॒दाति वि

वा ए॒तद् य॒ज्ञं – [] 43

TS 2.6.8.2 - Padam

आ॒र्ति॒म् । ए॒ति । ऋ॒च्छेत् । यत् । अ॒ग्नौ । जु॒हु॒यात् । रु॒द्राय॑ ।
प॒शून् । अ॒पीति॑ । द॒द्ध्य॒यात् । अ॒प॒शुः । य॒ज॒मा॒नः । स्या॒त् । वा॒चः ।
प॒तये॑ । त्वा । हु॒तम् । प्रेति॑ । अ॒श्ना॒मि । इति॑ । आ॒ह । प॒रोक्ष॑मिति॑
प॒रः – अ॒क्षम् । ए॒व । ए॒नत् । जु॒होति॑ । स॒द॒सः । प॒तये॑ । त्वा ।
हु॒तम् । प्रेति॑ । अ॒श्ना॒मि । इति॑ । आ॒ह । स्व॒गाकृ॑त्या इति॑
स्व॒गा – कृ॒त्यै । प्रेति॑ । अ॒श्न॒न्ति । ती॒र्थे । ए॒व । प्रेति॑ । अ॒श्न॒न्ति ।
दक्षि॑णाम् । द॒दाति॑ । ती॒र्थे । ए॒व । दक्षि॑णाम् । द॒दाति॑ । वी॒ति । वै ।

ए॒तत् । य॒ज्ञम् । 43 (50)

TS 2.6.8.3

छि॒न्दन्ति॑ य॒न्मद्ध्य॑तः प्रा॒श्न॒न्त्य॒द्भिर्मा॑र्जयन्त॒ आपो॑ वै सर्वा॑ दे॒वता॑
दे॒वता॑भिरे॒व य॒ज्ञं सं त॑न्वन्ति दे॒वा वै य॒ज्ञाद्-रु॒द्रम॑न्त॒राय॑न्त्स
य॒ज्ञम॑वि॒द्ध्य॒त् तं दे॒वा अ॒भि स॑म॒गच्छ॑न्त॒ कल्प॑तां न इ॒दमि॑ति॒

ते॒ऽब्रु॒वन्त् स्वि॒ष्टं॑ वै॒ न इ॒दं भ॒विष्य॑ति॒ यदि॒म॒॒ रा॒धयि॑ष्या॒म इति॒ तथ्
स्वि॒ष्टकृ॑तः स्वि॒ष्टकृ॑त्त्वं तस्या॒ ऽऽवि॑द्धं॒ नि – [] 44

TS 2.6.8.3 - Padam

छि॒न्दन्ति॑ । यत् । म॒द्ध्यतः॑ । प्रा॒श्नन्ती॑ति॒ प्र – अ॒श्नन्ति॑ ।
अ॒द्भिरि॑त्यत् – भिः । मा॒र्जय॑न्ते । आपः । वै । सर्वाः॑ । दे॒वताः॑ ।
दे॒वता॑भिः । ए॒व । य॒ज्ञम् । समि॑ति । त॒न्वन्ति॑ । दे॒वाः । वै । य॒ज्ञात् ।
रु॒द्रम् । अ॒न्तः । आ॒यन् । सः । य॒ज्ञम् । अ॒वि॒द्ध्यत् । तम् । दे॒वाः ।
अ॒भि । समि॑ति । अ॒गच्छ॑न्त । क॒ल्पता॑म् । नः । इ॒दम् । इति॑ । ते ।
अ॒ब्रु॒वन् । स्वि॒ष्टमि॑ति॒ सु – इ॒ष्टम् । वै । नः । इ॒दम् । भ॒विष्य॑ति ।
यत् । इ॒मम् । रा॒धयि॑ष्या॒मः । इति॑ । तत् । स्वि॒ष्टकृ॑त इति॑
स्वि॒ष्ट – कृ॑तः । स्वि॒ष्टकृ॑त्त्वमि॑ति॒ स्वि॒ष्टकृ॑त् – त्वम् । तस्य॑ ।
आ॒वि॒द्धमि॑त्या – वि॒द्धम् । नि॒रिति॑ । 44 (50)

TS 2.6.8.4

–र॑कृ॒न्तन् । यवे॑न॒ सम्मि॑तं॒ तस्मा॑द्–य॒वमा॒त्रम॑व॒ द्येद्–य॒ज्ज्या॑यो॒ऽवद्–
येद्–रो॒पये॑त् तद्–य॒ज्ञस्य॑ यदु॒प च॑ स्तृणी॒याद॑भि
च॑ घा॒रये॑दु॒भयतः॑ स॒श्वायि॑ कुर्या॒दव॑दा॒याभि॑ घा॒रय॑ति॒ द्विः संप॑द्यते

द्वि॒पाद्-यज॑मानः॒ प्रति॑ष्ठित्यै॒ यत् ति॒रश्ची॑न-मति॒-हरे॑दनभि-विद्धं
य॒ज्ञस्या॑भि वि॒द्ध्येद॑ग्रेण॒ परि॑ हरति ती॒र्थेनै॒व परि॑ हरति॒ तत् पू॒ष्णे
पर्य॑हरन् तत् - [] 45

TS 2.6.8.4 - Padam

अ॒कृ॒न्त॒न् । यवे॑न । सं॒मित॑मि॒ति सं - मि॒तम् । तस्मा॑त् ।
यव॑मात्रमि॒ति यव॑ - मा॒त्रम् । अवे॑ति । द्ये॒त् । यत् । ज्या॑यः ।
अ॒वद्ये॑दित्यव - द्ये॒त् । रोप॑येत् । तत् । य॒ज्ञस्य॑ । यत् । उपे॑ति । च ।
स्तृ॒णीया॑त् । अ॒भीति॑ । च । घा॒रये॑त् ।
उ॒भय॑तः स॒ञ्चायी॑त्यु॒भय॑तः - स॒ञ्चायि॑ । कुर्या॑त् ।
अ॒वदा॑येत्यव - दा॒य । अ॒भीति॑ । घा॒रय॑ति । द्विः । स॒मिति॑ । प॒द्यते॑ ।
द्वि॒पादि॑ति द्वि - पा॒त् । यज॑मानः । प्र॒तिष्ठि॑त्या इति॒ प्रति॑ - स्थि॒त्यै ।
यत् । ति॒रश्ची॑नम् । अ॒तिहरे॑दित्यति - हरे॑त् ।
अ॒नभि॑विद्धमि॒त्यन॑भि - वि॒द्धम् । य॒ज्ञस्य॑ । अ॒भीति॑ । वि॒द्ध्येत् ।
अ॒ग्रेण॑ । प॒रीति॑ । ह॒रति॑ । ती॒र्थेन॑ । ए॒व । प॒रीति॑ । ह॒रति॑ । तत् ।
पू॒ष्णे । प॒रीति॑ । अ॒हर॑न् । तत् । 45 (50)

TS 2.6.8.5

पू॒षा प्रा॑श्य द॒तोऽरु॑णत् तस्मा॑त् पू॒षा प्र॑पि॒ष्टभा॑गोऽद॒न्तको॑
हि तं दे॒वा अब्रु॑वन् वि वा अ॒यमा॑र्द्ध्यप्रा॒शि॒त्रियो॒ वा अ॒यम॑भू॒दिति॑
तद्-बृ॒हस्प॑तये पर्य॑हरन्त् सोऽबि॑भेद्-बृ॒हस्प॑तिरि॒त्थं वा॑व स्य
आ॒र्तिमा॑रि॒ष्यती॑ति स ए॒तं मन्त्र॑मप॒श्यथ् सूर्य॑स्य त्वा चक्षु॑षा प्र॒ति
प॒श्यामी॑त्यब्रवी॒न्न हि सूर्य॑स्य चक्षुः - [] 46

TS 2.6.8.5 - Padam

पू॒षा । प्रा॑श्येति प्र - अ॒श्य । द॒तः । अ॒रु॒णत् । तस्मा॑त् । पू॒षा ।
प्र॒पि॒ष्टभा॑ग इति प्र॒पि॒ष्ट - भा॒गः । अ॒द॒न्तकः॑ । हि । तम् । दे॒वाः ।
अ॒ब्रु॒वन् । वी॑ति । वै । अ॒यम् । आ॒र्द्ध्य । अ॒प्रा॒शि॒त्रिय
इ॒त्यप्र॑ - अ॒शि॒त्रियः॑ । वै । अ॒यम् । अ॒भूत् । इति॑ । तत् ।
बृ॒हस्प॑तये । परी॑ति । अ॒हर॑न् । सः । अ॒बि॑भेत् । बृ॒हस्प॑तिः ।
इ॒त्थम् । वा॑व । स्यः । आ॒र्तिम् । ए॒ति । अ॒रि॒ष्यति॑ । इति॑ । सः ।
ए॒तम् । मन्त्र॑म् । अ॒प॒श्यत् । सूर्य॑स्य । त्वा । चक्षु॑षा । प्र॒तीति॑ ।
प॒श्यामि॑ । इति॑ । अ॒ब्र॒वीत् । न । हि । सूर्य॑स्य । चक्षुः॑ । 46 (50)

TS 2.6.8.6

किं च॒न हि॒नस्ति॒ सोऽ॒बि॒भेत्॒ प्रति॑गृ॒ह्णन्तं॑ मा हि॒॒सि॒ष्यतीति॑
 दे॒वस्य॑ त्वा स॒वि॒तुः प्र॒स॒वेऽ॒श्विनो॑ बा॒हु॒भ्यां पू॒ष्णो ह॒स्ता॒भ्यां
 प्रति॑ गृ॒ह्णामीत्य॑ब्रवी॒थ् स॒वि॒तृप्र॑सू॒त ए॒वैन॑द्ब्रह्म॒णा दे॒वता॑भिः
 प्रत्य॑गृ॒ह्णाथ् सोऽ॒बि॒भेत् प्रा॒श्नन्तं॑ मा हि॒॒सि॒ष्यतीत्य॑ग्नेस्त्वा
 ऽऽस्ये॑न प्रा॒श्नामीत्य॑ब्रवी॒न्न ह्य॒ग्नेरा॒स्यं किञ्च॑न

हि॒नस्ति॒ सोऽ॒बि॒भेत् – [] 47

TS 2.6.8.6 - Padam

किम् । च॒न । हि॒नस्ति॒ । सः । अ॒बि॒भेत् । प्रति॑गृ॒ह्णन्त॑मि॒ति
 प्रति – गृ॒ह्णन्त॑म् । मा । हि॒॒सि॒ष्य॒ति । इति॑ । दे॒वस्य॑ । त्वा ।
 स॒वि॒तुः । प्र॒स॒व इति॑ प्र – स॒वे । अ॒श्वि॒नोः । बा॒हु॒भ्यामि॒ति
 बा॒हु – भ्या॑म् । पू॒ष्णः । ह॒स्ता॒भ्याम् । प्रती॑ति । गृ॒ह्णामि॑ । इति॑ ।
 अ॒ब्रवी॑त् । स॒वि॒तृप्र॑सू॒त इति॑ स॒वि॒तृ – प्र॒सू॒तः । ए॒व । ए॒नत् ।
 ब्रह्म॒णा । दे॒वता॑भिः । प्रती॑ति । अ॒गृ॒ह्णात् । सः । अ॒बि॒भेत् ।
 प्रा॒श्नन्त॑मि॒ति प्र – अ॒श्नन्त॑म् । मा । हि॒॒सि॒ष्य॒ति । इति॑ । अ॒ग्नेः ।
 त्वा । आ॒स्ये॑न । प्रेति॑ । अ॒श्ना॒मि । इति॑ । अ॒ब्रवी॑त् । न । हि ।

अ॒ग्नेः । आ॒स्य॑म् । कि॒म् । च॒न । हि॒न॒स्ति॑ । सः ।

अ॒बि॒भेत् । 47 (50)

TS 2.6.8.7

प्रा॒शितं॑ मा॒हि॒॒सि॒ष्य॑तीति॑ ब्रा॒ह्म॒ण॒स्यो॒द॒रे॒णे॒त्य॑ ब्रवी॒न्न हि॑ ब्रा॒ह्म॒ण॒स्यो॒द॒रं॑
किं च॒न हि॒न॒स्ति॑ बृ॒ह॒स्प॒ते॒र्ब्र॒ह्म॒णे॒ति॑ स हि ब्र॒ह्मि॒ष्ठो॒ऽप॒ वा ए॒त॒स्मात्॑
प्रा॒णाः क्रा॑म॒न्ति॒ यः प्रा॑शि॒त्रं प्रा॑श्ना॒त्य॒द्भि॒-मा॑र्जयित्वा प्रा॒णान्थ्
सं मृ॑श॒ते॒ऽमृतं॑ वै प्रा॒णा अ॒मृत॑मापः प्रा॒णाने॒व य॑था॒स्थान॑मुप
ह्वय॑ते ॥ 48

TS 2.6.8.7 - Padam

प्रा॒शित॑मि॒ति प्र-अ॒शित॑म् । मा । हि॒॒सि॒ष्य॑ति । इति॑ । ब्रा॒ह्म॒ण॒स्य॑ ।
उ॒द॒रे॒ण॑ । इति॑ । अ॒ब्रवी॑त् । न । हि । ब्रा॒ह्म॒ण॒स्य॑ । उ॒द॒र॑म् । कि॒म् ।
च॒न । हि॒न॒स्ति॑ । बृ॒ह॒स्प॒तेः॑ । ब्र॒ह्म॒णा॑ । इति॑ । सः । हि । ब्र॒ह्मि॒ष्ठः ।
अपे॑ति । वै । ए॒त॒स्मात् । प्रा॒णा इति॑ प्र - अ॒नाः । क्रा॑म॒न्ति॒ यः ।
प्रा॒शि॒त्रमि॒ति प्र - अ॒शि॒त्रम् । प्रा॑श्ना॒तीति॑ प्र - अ॒श्ना॒ति॑ ।
अ॒द्भिरि॑त्यत् - भिः । मा॑र्जयित्वा । प्रा॒णानि॑ति॒ प्र-अ॒नान् । समि॑ति ।
मृ॑श॒ते॒ऽमृत॑म् । वै । प्रा॒णा इति॑ प्र - अ॒नाः । अ॒मृत॑म् । आ॒पः ।

प्रा॒णानि॑ति प्र – अ॒नान् । ए॒व । य॒था॒स्थान॑मिति यथा – स्थान॑म् ।

उ॒पेति॑ । ह॒व॒य॒ते ॥ 48 (44)

(प्रा॒श्नी॒या॒द्धोता॑ – य॒ज्ञं – नि – र॒हर॑न्त – च॒क्षुः – रा॒स्यं॑ किञ्च॒न
हि॒न॒स्ति सोऽ॒बि॒भे – च॒तु॑श्च॒त्वारि॑ंश॒च्च) (A8)

TS 2.6.9.1

अ॒ग्नी॒ध आ द॑धा-त्य॒ग्नि॒मु॒खा-ने॒वर्तून् प्री॑णाति स॒मि॒ध॒मा
द॒धा॒त्यु॒त्तरा॑सा-माहु॒तीनां॑ प्र॒ति॒ष्ठि॒त्या अ॒थो स॒मि॒द्व॒त्ये॒व जु॑होति
परि॒धी॒न्त्सं मा॑र्ष्टि पु॒ना॒त्ये॒वैनान्त्सं स॒कृ॒त्स॒कृ॒त्सं मा॑र्ष्टि परा॒डि॒व
ह्ये॒तर्हि॑ य॒ज्ञश्च॒तुः सं प॑द्यते च॒तु॒ष्पा॒दः प॒शवः॑ प॒शू॒ने॒वा॒व रु॒न्धे ब्र॑ह्मन्
प्र॒स्था॒स्याम॑ इ॒त्या॒हा॒त्र वा ए॒तर्हि॑ य॒ज्ञः श्रि॒तो – [] 49

TS 2.6.9.1 - Padam

अ॒ग्नी॒ध इ॒त्य॒ग्नि – इ॒धे । ए॒ति । द॒धा॒ति ।
अ॒ग्नि॒मु॒खा॒नि॒त्य॒ग्नि – मु॒खा॒न् । ए॒व । ऋ॒तून् । प्री॑णाति । स॒मि॒ध॒मि॒ति
सं – इ॒धम् । ए॒ति । द॒धा॒ति । उ॒त्तरा॑सामि॒त्यु॒त् – त॒रा॒साम् ।
आहु॒ती॒ना॒मि॒त्या – हु॒ती॒ना॒म् । प्र॒ति॒ष्ठि॒त्या इति॑ प्र॒ति – स्थि॒त्यै ।

अथो॑ इति॑ । स॒मि॒द्विती॑ति॒ स॒मि॒त् – व॒ति । ए॒व । जु॒होति॑ ।
 प॒रि॒धी॒नि॒ति॑ प॒रि – धी॒न् । स॒मि॒ति॑ । मा॒र्ष्टि॑ । पु॒नाति॑ । ए॒व । ए॒नान् ।
 स॒कृ॒त्स॒कृ॒दि॒ति॑ स॒कृ॒त् – स॒कृ॒त् । स॒मि॒ति॑ । मा॒र्ष्टि॑ । प॒राङ् । इ॒व ।
 हि । ए॒तर्॒हि॑ । य॒ज्ञः । च॒तुः । स॒मि॒ति॑ । प॒द्य॒ते । च॒तु॒ष्पा॒द इति॑
 च॒तुः – पा॒दः । प॒श॒वः । प॒शून् । ए॒व । अ॒वेति॑ । रु॒न्धे । ब्र॒ह्मन् ।
 प्रेति॑ । स्था॒स्यामः॑ । इति॑ । आ॒ह । अ॒त्र । वै । ए॒तर्॒हि॑ । य॒ज्ञः ।

श्रि॒तः । 49 (50)

TS 2.6.9.2

य॒त्र ब्र॒ह्मा य॒त्रै॒व य॒ज्ञः श्रि॒तस्त॑त ए॒वैन॒मा र॑भ॒ते य॒द्धस्ते॑न
 प्र॒मी॒वे॒द्वेप॑नः स्या॒द्यच्छी॒र्ष्णा शी॑र्ष॒क्ति॒मान्थ् – स्या॒द्यत् तू॒ष्णी॒मासी॑ता
 ऽसं॑प्र॒त्तो य॒ज्ञः स्या॒त् प्र॒ति॒ष्ठे॒त्ये॒व ब्रू॑याद् – वा॒चि वै य॒ज्ञः श्रि॒तो य॒त्रै॒व
 य॒ज्ञः श्रि॒तस्त॑त ए॒वैन॒ं सं प्र॑ य॒च्छति॑ दे॒व स॒वि॒तरे॒तत् ते

प्रा – [] 50

TS 2.6.9.2 - Padam

य॒त्र । ब्र॒ह्मा । य॒त्र । ए॒व । य॒ज्ञः । श्रि॒तः । त॑तः । ए॒व । ए॒नम् ।
 ए॒ति॑ । र॒भ॒ते । य॒त् । ह॒स्ते॒न । प्र॒मी॒वे॒दि॒ति॑ प्र – मी॒वे॒त् । वे॒प॒नः ।

स्यात् । यत् । शी॒र्ष्णा । शी॒र्ष॒क्ति॒मानि॒ति शी॒र्ष॒क्ति॒-मा॒न् । स्यात् ।
यत् । तू॒ष्णी॒म् । आसी॑त् । अ॒संप्र॑त्त इत्य॑सं-प्र॒त्तः । य॒ज्ञः । स्यात् ।
प्र॒ति । ति॒ष्ठ । इति॑ । ए॒व । ब्रू॒यात् । वा॒चि । वै । य॒ज्ञः । श्रि॒तः ।
यत्र॑ । ए॒व । य॒ज्ञः । श्रि॒तः । ततः॑ । ए॒व । ए॒नम् । स॒म् । प्रेति॑ ।
य॒च्छ॒ति । दे॒व । स॒वि॒तः । ए॒तत् । ते । प्रेति॑ । 50 (50)

TS 2.6.9.3

-ऽहे॒त्याह॑ प्र॒सू॒त्यै बृ॒ह॒स्प॒ति ब्र॒ह्मे॒त्याह॑ स हि ब्र॒ह्मि॒ष्ठः स य॒ज्ञं
पा॒हि स य॒ज्ञप॑तिं पा॒हि स मां पा॒ही॒त्याह॑ य॒ज्ञाय॑ यज॒माना॒याऽऽत्म॑ने
तेभ्य॑ ए॒वाऽऽशि॒ष॒मा शा॒स्तेऽना॑र्त्या आ॒श्राव्याऽऽह॑ दे॒वान् य॒जेति॑
ब्र॒ह्म॒वादि॑नो वद॒न्ती॒ष्टा दे॒वता॑ अथ॑ क॒तम॑ ए॒ते दे॒वा इति॑ छ॒न्दा॒ऽसी॑ति
ब्रू॒याद्-गा॒य॒त्रीं त्रि॒ष्टु॒भं - [] 51

TS 2.6.9.3 - Padam

आ॒ह । इति॑ । आ॒ह । प्र॒सू॒त्या इति॑ प्र - सू॒त्यै । बृ॒ह॒स्प॒तिः । ब्र॒ह्मा ।
इति॑ । आ॒ह । सः । हि । ब्र॒ह्मि॒ष्ठः । सः । य॒ज्ञम् । पा॒हि । सः ।
य॒ज्ञप॑तिमि॒ति य॒ज्ञ - प॒तिम् । पा॒हि । सः । मा॒म् । पा॒हि । इति॑ ।
आ॒ह । य॒ज्ञाय॑ । यज॒मानाय॑ । आ॒त्म॒ने । तेभ्यः॑ । ए॒व ।

आ॒शि॒ष॒मि॒त्या॑ – शि॒ष॒म् । ए॒ति॑ । शा॒स्ते॑ । अ॒ना॒त्यै॑ ।
 आ॒श्रा॒व्ये॒त्या॑ – श्रा॒व्य॑ । आ॒ह॒ । दे॒वान् । य॒ज॒ । इति॑ ।
 ब्र॒ह्म॒वा॒दि॒न॒ इति॑ ब्र॒ह्म – वा॒दि॒नः॑ । व॒द॒न्ति॑ । इ॒ष्टाः॑ । दे॒वताः॑ । अथ॑ ।
 क॒त॒मे॑ । ए॒ते॑ । दे॒वाः॑ । इति॑ । छ॒न्दा॒ँ॒सि॑ । इति॑ । ब्रू॒यात् । गा॒य॒त्री॒म् ।
 त्रि॒ष्टु॒भ॒म् । 51 (50)

TS 2.6.9.4

ज॒गती॑मि॒त्यथो॑ ख॒ल्वाहु॑र्ब्रा॒ह्म॒णा वै छ॒न्दा॒ँ॒सीति॑ ता॒ने॒व तद्-य॑जति
 दे॒वानां॑ ँ॒वा इ॒ष्टा दे॒वता॑ आ॒स॒न्न॒था॒ग्नि॒र्नो॒द॒ज्वल॑त् तं दे॒वा
 आ॒हु॒ती॒भि-र॑नू॒या॒जे॒ष्वन्व॑-वि॒न्दन्॑ य॒द॒नू॒या॒जान् य॑ज॒त्य॒ग्नि॒मे॒व तथ्
 स॒मि॒न्ध ए॒तदु॒र्वै ना॒माऽऽ*सु॒र आ॒सी॒थ् स ए॒तर्हि॑ य॒ज्ञ॒स्या
 ऽऽशि॒ष॒म॒वृ॒द्धं यद् ब्रू॒या॒दे॒त – [] 52

TS 2.6.9.4 - Padam

ज॒गती॑म् । इति॑ । अथो॑ इति॑ । ख॒लु॑ । आ॒हुः॑ । ब्रा॒ह्म॒णाः॑ । वै ।
 छ॒न्दा॒ँ॒सि॑ । इति॑ । ता॒न् । ए॒व । तत् । य॒ज॒ति॑ । दे॒वाना॑म् । वै ।
 इ॒ष्टाः॑ । दे॒वताः॑ । आ॒स॒न्न॑ । अथ॑ । अ॒ग्निः॑ । न । उ॒दि॒ति॑ ।
 अ॒ज्व॒ल॒त् । तम् । दे॒वाः॑ । आ॒हु॒ती॒भि॒रि॒त्याहु॑ति – भिः॑ ।

अ॒नू॒या॒जे॒ष्वि॒त्यनु॑ – या॒जेषु॑ । अ॒न्वि॒ति॑ । अ॒वि॒न्द॒न् । यत् ।
अ॒नू॒या॒जा॒नि॒त्यनु॑ – या॒जान् । यज॑ति । अ॒ग्नि॒म् । ए॒व । तत् । स॒मि॒ति॑ ।
इ॒न्धे । ए॒तदुः॑ । वै । ना॒म॑ । आ॒सु॒रः । आ॒सी॒त् । सः । ए॒तर्हि॑ ।
य॒ज्ञस्य॑ । आ॒शि॒ष॒मि॒त्या॑ – शि॒ष॒म् । अ॒वृ॒ङ्क्षु॑ । यत् । ब्रू॒यात् ।

ए॒तत् । 52 (50)

TS 2.6.9.5

– दु॒ द्या॒वा॒पृ॒थि॒वी भ॒द्र–म॒भू॒दि॒त्ये॒तदु॑ – मे॒वाऽऽसु॑रं य॒ज्ञस्याऽऽशि॑षं
ग॒मये॒दिदं॑ द्या॒वा॒पृ॒थि॒वी भ॒द्रम॒भू॒दि॒त्ये॒व ब्रू॒याद्–यज॑मानमे॒व
य॒ज्ञस्याऽऽशि॑षं ग॒मय॑त्या॒र्ध्मं सू॒क्तवा॒कमु॒त न॒मोवा॒कमि॒–
त्या॒हे॒दम॒रा॒थ–स्मे॒ति वा॒वैत॒दा॒हो॒प॒श्रि॒तो दि॒वः पृ॒थि॒व्यो॒रित्या॑ह
द्या॒वा॒पृ॒थि॒व्यो॒र्हि य॒ज्ञ उप॑श्रि॒त ओ॒मन्व॑ती तेऽस्मिन् य॒ज्ञे यज॑मान
द्या॒वा॒पृ॒थि॒वी – [] 53

TS 2.6.9.5 - Padam

उ । द्या॒वा॒पृ॒थि॒वी इति॑ द्या॒वा – पृ॒थि॒वी । भ॒द्रम् । अ॒भू॒त् । इति॑ ।
ए॒तदु॑म् । ए॒व । आ॒सु॒रम् । य॒ज्ञस्य॑ । आ॒शि॒ष॒मि॒त्या॑ – शि॒ष॒म् ।
ग॒मये॒त् । इ॒दम् । द्या॒वा॒पृ॒थि॒वी इति॑ द्या॒वा – पृ॒थि॒वी । भ॒द्रम् ।

अ॒भू॒त् । इति॑ । ए॒व । ब्रू॒यात् । यज॑मानम् । ए॒व । य॒ज्ञस्य॑ ।
 आ॒शि॒ष॒मि॒त्या॑ – शि॒ष॒म् । ग॒म॒य॒ति॑ । आ॒र्ध्म॑ । सू॒क्त॒वा॒क॒मि॒ति॑
 सू॒क्त॒ – वा॒क॒म् । उ॒त । न॒मो॒वा॒क॒मि॒ति॑ नमः॑ – वा॒क॒म् । इति॑ ।
 आ॒ह॒ । इ॒द॒म् । अ॒रा॒थ॒स्म॒ । इति॑ । वा॒व । ए॒त॒त् । आ॒ह॒ ।
 उ॒प॒श्रि॒त॒ इ॒त्यु॒प॒ – श्रि॒तः॑ । दि॒वः॑ । पृ॒थि॒व्योः॑ । इति॑ । आ॒ह॒ ।
 द्या॒वा॒पृ॒थि॒व्यो॒रि॒ति॑ द्या॒वा॒ – पृ॒थि॒व्योः॑ । हि॒ । य॒ज्ञः॑ । उ॒प॒श्रि॒त॒
 इ॒त्यु॒प॒ – श्रि॒तः॑ । ओ॒म॒न्व॒ती॒ इ॒त्यो॒म॒न् – व॒ती॒ । ते॒ । अ॒स्मि॒न् ।
 य॒ज्ञे॑ । य॒ज॒मा॒न॒ । द्या॒वा॒पृ॒थि॒वी॒ इति॑ द्या॒वा॒ – पृ॒थि॒वी॒ । 53 (50)

TS 2.6.9.6

स्ता॒मि॒त्या॒हा ऽशि॑ष॒मे॒वै॒ता॒मा॒ शा॒स्ते॒ यद्ब्रू॑याथ् सू॒पा॒व॒सा॒ना च॑
 स्व॒द्ध्य॒व॒सा॒ना चे॒ति॑ प्र॒मा॒यु॒को यज॑मानः स्याद्य॒दा हि॑ प्र॒मी॒य॒ते
 ऽथे॒मा॒मु॒पा॒व॒स्य॒ति॑ सू॒प॒च॒र॒णा च॑ स्व॒धि॒च॒र॒णा चे॒त्ये॒व ब्रू॑याद् –
 व॒री॒य॒सी॒मे॒वा॒स्मै॒ ग॒व्यू॒ति॒मा॒ शा॒स्ते॒ न प्र॒मा॒यु॒को भ॑वति
 तयो॒रा॒वि॒द्य॒ग्नि॒रि॒द॒ꣳ ह॒वि॒र॒जु॒ष॒ते॒त्या॒ह॒ या अ॒या॒क्ष्म॑ – [] 54

TS 2.6.9.6 - Padam

स्ताम् । इति । आह । आशिषमित्या॑-शिषम् । एव । एताम् । एति ।
शास्ते । यत् । ब्रूयात् । सूपावसानेति॑ सु - उपावसाना । च ।
स्वद्ध्यवसानेति॑ सु - अद्ध्यवसाना । च । इति ।
प्रमायुक॑ इति प्र - मायुकः । यजमानः । स्यात् । यदा । हि ।
प्रमीयत॑ इति प्र - मीयते । अथ । इमाम् ।
उपावस्यतीत्युप॑ - अवस्यति । सूपचरणेति॑ सु - उपचरणा । च ।
स्वधिचरणेति॑ सु - अधिचरणा । च । इति । एव । ब्रूयात् ।
वरीयसीम् । एव । अस्मै । गव्यूतिम् । एति । शास्ते । न ।
प्रमायुक॑ इति प्र - मायुकः । भवति । तयोः । आविदीत्या॑-विदि ।
अग्निः । इदम् । हविः । अजुषत॑ । इति । आह । याः ।

॥
अयाक्ष्म । 54 (50)

TS 2.6.9.7

देवतास्ता॑ अरीरधामेति॑ वावैतदाह॑ यन्न निर्दिशेत्॑ प्रतिवेशं॑ यज्ञस्या॑
ऽऽशीर्गच्छेदा॑ शास्तेऽयं॑ यजमानोऽसावित्याह॑ निर्दिश्यैवैनं॑ सुवर्गं॑
लोकं॑ गमयत्यायुरा॑ शास्ते सुप्रजास्त्वमा॑ शास्त॑ इत्याहा॑ ऽशिषमेवै॑

ता॒मा शा॒स्ते स॒जा॒त॒व॒न॒स्या॒मा शा॒स्त इ॒त्या॒ह प्रा॒णा वै स॒जा॒ताः

प्रा॒णाने॒व – [] 55

TS 2.6.9.7 - Padam

दे॒वताः॑ । ताः॑ । अ॒री॒र॒धा॒म । इति॑ । वा॒व । ए॒तत् । आ॒ह । यत् । न ।
नि॒दि॒शे॒दि॒ति निः॑ – दि॒शेत् । प्र॒ति॒वे॒श॒मि॒ति प्र॒ति – वे॒श॒म् ।
य॒ज्ञस्य॑ । आ॒शी॒रि॒त्या – शीः॑ । ग॒च्छेत् । ए॒ति । शा॒स्ते । अ॒यम् ।
य॒ज॒मा॒नः । अ॒सौ । इति॑ । आ॒ह । नि॒दि॒श्ये॒ति निः॑ – दि॒श्य । ए॒व ।
ए॒नम् । सु॒व॒र्ग॒मि॒ति सु॒वः-ग॒म् । लो॒कम् । ग॒म॒य॒ति । आ॒युः । ए॒ति ।
शा॒स्ते । सु॒प्र॒जा॒स्त्व॒मि॒ति सु॒प्र॒जाः – त्व॒म् । ए॒ति । शा॒स्ते ।
इति॑ । आ॒ह । आ॒शि॒ष॒मि॒त्या-शि॒ष॒म् । ए॒व । ए॒ता॒म् । ए॒ति । शा॒स्ते ।
स॒जा॒त॒व॒न॒स्या॒मि॒ति स॒जा॒त – व॒न॒स्या॒म् । ए॒ति । शा॒स्ते । इति॑ ।
आ॒ह । प्रा॒णा इति॑ प्र – अ॒नाः । वै । स॒जा॒ता इति॑ स – जा॒ताः ।
प्रा॒णानि॑ति प्र – अ॒नान् । ए॒व । 55 (50)

TS 2.6.9.8

ना॒न्त॒रे॒ति तद॒ग्नि॒र्दे॒वो दे॒वे॒भ्यो व॒न॒ते व॒यम॒ग्ने॒र्मा॒नु॒षा इ॒त्या॒हा॒ग्नि॒र्दे॒वे॒भ्यो
व॒नु॒ते व॒यं म॒नु॒ष्ये॒भ्य इति॑ वा॒वै॒तदा॒हे॒ह ग॒ति॒र्वा॒मस्ये॒दं च॒ नमो॑

दे॒वेभ्य॑ इ॒त्याह॑ याश्चै॒व दे॒वता॑ यज॒ति याश्च॑ न ताभ्य॑ ए॒वोभयी॑भ्यो
नम॑स्करोत्यात्मनोऽना॒र्त्ये ॥ 56

TS 2.6.9.8 - Padam

न । अ॒न्तः । ए॒ति । तत् । अ॒ग्निः । दे॒वः । दे॒वेभ्यः॑ । व॒नते॑ । व॒यम् ।
अ॒ग्नेः । मा॒नुषाः॑ । इ॒ति । आ॒ह । अ॒ग्निः । दे॒वेभ्यः॑ । व॒नुते॑ । व॒यम् ।
म॒नुष्यै॑भ्यः । इ॒ति । वा॒व । ए॒तत् । आ॒ह । इ॒ह । ग॒तिः । वा॒मस्य॑ ।
इ॒दम् । च । नमः॑ । दे॒वेभ्यः॑ । इ॒ति । आ॒ह । याः । च । ए॒व ।
दे॒वताः॑ । यज॒ति । याः । च । न । ताभ्यः॑ । ए॒व । उ॒भयी॑भ्यः ।
नमः॑ । क॒रोति॑ । आ॒त्मनः॑ । अ॒ना॒र्त्ये ॥ 56 (46)

(श्रितः – ते प्र – त्रिष्टुभ – मेतद् – द्यावापृथिवी – या अयाक्ष्म –
प्राणानेव – षट्चत्वारिंशच्च) (A9)

TS 2.6.10.1

दे॒वा वै य॒ज्ञस्य॑ स्व॒गाक॒र्तारं॑ नावि॒न्दन् ते॑ शँ॒युं बा॒र्हस्प॒त्यम॑ब्रुवन्नि॒मं
नो॑ य॒ज्ञꣳ स्व॒गा कु॒र्विति॑ सोऽब्र॒वीद्वरं॑ वृ॒णै यदे॒वा-ब्रा॒ह्मणो॒क्तो-
ऽश्र॑द्धानो यजा॒तै सा मे॑ य॒ज्ञस्याऽऽशी॑रस॒दिति॑ तस्मा॒द्-

यदब्राह्मणो॑क्तोऽश्रद्धा॑नो यज॑ते शं॑युमे॒व तस्य॑ बा॒र्हस्प॑त्यं य॒ज्ञस्या॑
ऽऽशी॑र्गच्छत्ये॒तन्ममे॑त्यब्रवीत् किं मे॑ प्र॒जाया॑ – [] 57

TS 2.6.10.1 - Padam

दे॒वाः । वै । य॒ज्ञस्य॑ । स्व॒गाक॑र्तारमि॒ति स्व॒गा – क॑र्तारि॒म् । न ।
अ॒वि॒न्दन् । ते । शं॑युमि॒ति शं – यु॒म् । बा॒र्हस्प॑त्यम् । अ॒ब्रुव॑न् ।
इ॒मम् । नः । य॒ज्ञम् । स्व॒गेति॑ स्व – गा । कुरु॑ । इति॑ । सः ।
अ॒ब्रवी॑त् । वर॑म् । वृ॒णै । यत् । ए॒व ।
अ॒ब्राह्म॑णो॒क्त इत्य॑ब्राह्मण – उ॒क्तः । अ॒श्रद्धा॑न इत्य॑श्रत् – द॒धानः॑ ।
यजा॑तै । सा । मे॒ । य॒ज्ञस्य॑ । आ॒शीरि॑त्या – शीः । अ॒सत् । इति॑ ।
तस्मा॑त् । यत् । अ॒ब्राह्म॑णो॒क्त इत्य॑ब्राह्मण – उ॒क्तः । अ॒श्रद्धा॑न
इत्य॑श्रत् – द॒धानः॑ । यज॑ते । शं॑युमि॒ति शं-यु॒म् । ए॒व । तस्य॑ ।
बा॒र्हस्प॑त्यम् । य॒ज्ञस्य॑ । आ॒शीरि॑त्या – शीः । ग॒च्छति॑ । ए॒तत् ।
मम॑ । इति॑ । अ॒ब्रवी॑त् । किम् । मे॒ ।
प्र॒जाया॑ इति॑ प्र – जा॒याः । 57 (50)

TS 2.6.10.2

इति॑ योऽपगु॑रा॒तै॑ श॒तेन॑ या॒तया॑द्यो नि॒हन॑त् स॒हस्रे॑ण या॒तया॑द्यो लो॒हितं॑
क॒रव॑द्यावतः प्र॒स्क॒द्य पा॒ञ्सू॑न्त् सं गृ॒ह्णात् ता॑वतः सँव॑त्स॒रान्
पि॒तृलो॒कं न प्र॑जा॒नादि॑ति तस्मा॑द्-ब्रा॒ह्म॒णाय॑ नाप॒ गुरे॑त न नि॒ ह॒न्या॒न्न
लो॒हितं॑ कुर्या॑दे॒ताव॑ता है॒नसा॑ भवति॒ तच्छँ॑योरा वृ॒णीम॑ह इत्या॒ह
य॒ज्ञमे॒व तथ् स्व॒गा करो॑ति॒ त - [] 58

TS 2.6.10.2 - Padam

इति॑ । यः । अ॒पगु॑रा॒ता इत्य॑प - गु॒रा॒तै॑ । श॒तेन॑ । या॒तया॑त् । यः ।
नि॒हन॑दिति॒ नि - ह॑नत् । स॒हस्रे॑ण । या॒तया॑त् । यः । लो॒हितम् ।
क॒रव॑त् । या॒वतः॑ । प्र॒स्क॒द्येति॑ प्र - स्क॒द्य । पा॒ञ्सू॑न् । सं॒गृ॒ह्णादि॑ति
सं - गृ॒ह्णात् । ता॑वतः । सँव॑त्स॒रानिति॑ सं - व॒त्स॒रान् ।
पि॒तृलो॒कमिति॑ पि॒तृ-लो॒कम् । न । प्रेति॑ । जा॒नात् । इति॑ । तस्मा॑त् ।
ब्रा॒ह्म॒णाय॑ । न । अपेति॑ । गु॒रे॒त । न । नीति॑ । ह॒न्यात् । न ।
लो॒हितम् । कुर्या॑त् । ए॒ताव॑ता । ह॒ । ए॒नसा॑ । भ॒वति॑ । तत् ।
शँ॑यो॒रिति॑ शं-योः । एति॑ । वृ॒णीम॑हे । इति॑ । आ॒ह । य॒ज्ञम् । ए॒व ।
तत् । स्व॒गेति॑ स्व - गा । करो॑ति॒ तत् । 58 (50)

TS 2.6.10.3

–च्छँ॑यो॒रा वृ॒णीम॑ह॒ इत्या॑ह॒ शँ॑यु॒मेव॑ बा॒र्हस्प॑त्यं भा॒गधे॑ये॒न
सम॑दर्ध॒यति॑ गा॒तुं य॒ज्ञाय॑ गा॒तुं य॒ज्ञप॑तय॒ इत्या॑हा ऽऽशि॒षमे॑वै ता॒मा
शा॑स्ते॒ सोमं॑ य॒जति॑ रे॒त ए॒व तद्–द॑धाति॒ त्वष्टा॑रं य॒जति॑ रे॒त ए॒व हि॒तं
त्वष्टा॑ रू॒पाणि॑ वि॒ करो॑ति दे॒वानां॑ प॒त्नीर्य॑जति मिथु॒नत्वा॑याग्निं गृ॒हप॑तिं
य॒जति॑ प्र॒तिष्ठि॑त्यै जा॒मि वा ए॒तद्–य॒ज्ञस्य॑ क्रि॒यते॑ – [] 59

TS 2.6.10.3 - Padam

शँ॑यो॒रिति॑ शं – योः । ए॒ति । वृ॒णीम॑हे । इ॒ति । आ॒ह । शँ॑यु॒मिति॑
शं – यु॒म् । ए॒व । बा॒र्हस्प॑त्यम् । भा॒गधे॑ये॒नेति॑ भा॒ग – धे॑ये॒न ।
समि॑ति । अ॒र्ध॒यति॑ । गा॒तुम् । य॒ज्ञाय॑ । गा॒तुम् । य॒ज्ञप॑तय॒ इति॑
य॒ज्ञ–प॑तये । इ॒ति । आ॒ह । आ॒शि॒षमि॑त्या – शि॒षम् । ए॒व । ए॒ताम् ।
ए॒ति । शा॑स्ते । सोम॑म् । य॒जति॑ । रे॒तः । ए॒व । तत् । द॑धाति ।
त्वष्टा॑रम् । य॒जति॑ । रे॒तः । ए॒व । हि॒तम् । त्वष्टा॑ । रू॒पाणि॑ । वी॒ति ।
क॒रोति॑ । दे॒वानां॑ । प॒त्नीः । य॒जति॑ । मिथु॒नत्वा॑येति॑ मिथु॒न–त्वा॑य ।
अ॒ग्निम् । गृ॒हप॑तिमि॒ति गृ॒ह – प॑तिम् । य॒जति॑ । प्र॒तिष्ठि॑त्या इति॑
प्र॒ति – स्थि॑त्यै । जा॒मि । वै । ए॒तत् । य॒ज्ञस्य॑ । क्रि॒यते॑ । 59 (50)

TS 2.6.10.4

यदा॑ज्ये॒न प्र॒या॒जा इ॒ज्यन्त॑ आ॒ज्ये॒न प॒त्नीसँ॑या॒जा ऋ॒चम॑नूच्य
प॒त्नीसँ॑या॒जाना॑मृ॒चा य॒जत्य॑जा॒मित्वा॒याथो॑ मि॒थुन॑त्वाय॒ प॒ङ्क्ति॑ प्रा॒यणो॑ वै
य॒ज्ञः प॒ङ्क्त्यु॑दय॒नः पञ्च॑ प्र॒या॒जा इ॒ज्यन्ते॑ च॒त्वारः॑ प॒त्नीसँ॑या॒जाः
स॒मिष्ट॑य॒जुः पञ्च॑मं प॒ङ्क्ति॑मे॒वानु॑ प्र॒यन्ति॑ प॒ङ्क्ति॑मनू॒द्यन्ति॑ ॥ 60

TS 2.6.10.4 - Padam

यत् । आ॒ज्ये॒न । प्र॒या॒जा इति॑ प्र – या॒जाः । इ॒ज्यन्ते॑ । आ॒ज्ये॒न ।
प॒त्नीसँ॑या॒जा इति॑ प॒त्नी – सँ॑या॒जाः । ऋ॒चम् ।
अ॒नूच्ये॑त्यनु – उच्य । प॒त्नीसँ॑या॒जाना॑मिति॑ प॒त्नी – सँ॑या॒जाना॑म् ।
ऋ॒चा । य॒जति॑ । अ॒जा॒मित्वा॒येत्य॑जा॒मि – त्वा॒य । अथो॑ इति॑ ।
मि॒थुन॑त्वायेति॑ मि॒थुन – त्वा॒य । प॒ङ्क्ति॑प्रा॒यण॑ इति॑ प॒ङ्क्ति – प्रा॒यणः॑ ।
वै । य॒ज्ञः । प॒ङ्क्त्यु॑दय॒न इति॑ प॒ङ्क्ति – उ॒दय॑नः । पञ्च॑ ।
प्र॒या॒जा इति॑ प्र – या॒जाः । इ॒ज्यन्ते॑ । च॒त्वारः॑ । प॒त्नीसँ॑या॒जा इति॑
प॒त्नी – सँ॑या॒जाः । स॒मिष्ट॑य॒जुरिति॑ स॒मिष्ट – य॒जुः । पञ्च॑मम् ।

प॒ङ्क्तिम् । ए॒व । अ॒न्विति॑ । प्र॒यन्तीति॑ प्र – य॒न्ति । प॒ङ्क्तिम् । अनु॑ ।
उ॒दिति॑ । य॒न्ति ॥ 60 (33)

(प्र॒जायाः॑ – क॒रोति॑ तत् – क्रि॒यते॑ – त्रय॑स्त्रि॒ंशच्च॑) (A10)

TS 2.6.11.1

यु॒क्ष्वाहि॑ दे॒व॒हूत॑मा॒ञ् अ॒श्वाञ् अ॒ग्ने र॒थीरि॑व ।

नि॒ होता॑ पू॒र्व्यः स॒दः ॥

उ॒त नो॑ दे॒व दे॒वाञ् अ॒च्छा वो॒चो वि॒दुष्ट॑रः ।

श्र॒द्धिश्चा॑ वा॒र्या कृ॒धि ॥

त्वञ् ह॒ यद्य॑वि॒ष्ट्य स॒हसः॑ सू॒नवा॑हु॒त ।

ऋ॒तावा॑ य॒ज्ञियो॑ भु॒वः ॥

अ॒यम॒ग्निः स॒हस्रि॑णो॒ वाज॑स्य श॒तिन॒स्पतिः॑ ।

मू॒र्धा क॒वी र॒यीणां॑ ॥

तं ने॒मि॒मृ॒भवो॑ य॒था ऽऽन॑म॒स्व स॒हूति॑भिः ।

ने॒दीयो॑ य॒ज्ञ – [] 61

TS 2.6.11.1 Padam

यु॒क्ष्व । हि॒ । दे॒व॒हू॒त॒मा॒नि॒ति॒ दे॒व॒-हू॒त॒मा॒न् । अ॒श्वान् । अ॒ग्ने॒ । र॒थीः ।
इ॒व ॥ नी॒ति॒ । हो॒ता॒ । पू॒र्व्यः । स॒दः ॥ उ॒त । नः । दे॒व । दे॒वान् ।
अ॒च्छ । वो॒चः । वि॒दु॒ष्ट॒र इति॑ वि॒दुः - त॒रः ॥ श्र॒त् । वि॒श्वा॒ । वा॒र्या॒ ।
कृ॒धि ॥ त्व॒म् । ह॒ । य॒त् । य॒वि॒ष्ट॒य । स॒ह॒सः । सू॒नो॒ ।
आ॒हु॒ते॒त्या - हु॒त ॥ ऋ॒ता॒वे॒त्यृ॒त - वा॒ । य॒ज्ञि॒यः । भु॒वः ॥ अ॒य॒म् ।
अ॒ग्निः । स॒ह॒स्रि॒णः । वा॒ज॒स्य॒ । श॒ति॒नः । प॒तिः ॥ मू॒र्धा॒ । क॒विः ।
र॒यी॒णाम् ॥ त॒म् । ने॒मि॒म् । ऋ॒भ॒वः । य॒था॒ । ए॒ति॒ । न॒म॒स्व ।
स॒हू॒ति॒भि॒रिति॑ स॒हू॒ति - भिः ॥ ने॒दी॒यः । य॒ज्ञ॒म् । 61 (50)

TS 2.6.11.2

-म॒ङ्गि॒रः ॥
त॒स्मै॒ नू॒ न॒म॒भि॒द्य॒वे वा॒चा वि॒रू॒प नि॒त्य॒या ।
वृ॒ष्णे॒ चो॒द॒स्व सु॒ष्टु॒तिं ॥
क॒मु॒ ष्वि॒द॒स्य॒ से॒न॒या॒ऽग्ने॒रपा॒क॒च॒क्ष॒सः ।
प॒णिं गो॒षु स्त॒राम॒हे ॥

मा नो दे॒वानां॑ वि॒शः॑ प्र॒स्नाती॑रि॒वो॒स्राः॑ ।

कृ॒शं न हा॑सु॒र॒घ्नियाः॑ ॥

मा नः॑ स॒मस्य॑ दू॒ढ्यः॑ परि॒द्वेष॑सो अ॒ह॒तिः॑ ।

ऊ॒र्मिर्न॑ ना॒व॒मा व॑धीत् ॥

नम॑स्ते अ॒ग्न ओज॑से गृ॒णन्ति॑ दे॒व कृ॑ष्ट॒यः॑ ।

अ॒मै – [] 62

TS 2.6.11.2 - Padam

अ॒ङ्गि॒रः॑ ॥ तस्मै॑ । नू॒नम् । अ॒भि॒द्य॒व इ॒त्य॒भि – द्य॒वे । वा॒चा ।

वि॒रू॒पेति॑ वि – रू॒प । नि॒त्य॒या ॥ वृ॒ष्णै॑ । चो॒द॒स्व । सु॒ष्टु॒तिमि॑ति॒

सु – स्तु॒तिम् ॥ कम् । उ । स्वि॒त् । अ॒स्य । से॒न॒या । अ॒ग्नेः॑ ।

अ॒पा॒क॒चक्ष॑स इ॒त्य॒पा॒क॒चक्ष॑सः ॥ प॒णिम् । गो॒षु । स्त॒रा॒म॒हे ॥ मा ।

नः॑ । दे॒वाना॑म् । वि॒शः॑ । प्र॒स्नाती॑रि॒ति प्र – स्ना॑तीः । इ॒व । उ॒स्राः॑ ॥

कृ॒शम् । न । हा॒सुः । अ॒घ्नियाः॑ ॥ मा । नः॑ । स॒मस्य॑ । दू॒ढ्यः॑ ।

परि॑द्वेष॒स इति॑ परि – द्वेष॑सः । अ॒ह॒तिः॑ ॥ ऊ॒र्मिः॑ । न । ना॒वम् ।

ए॒ति । व॒धी॒त् ॥ नमः॑ । ते॒ । अ॒ग्ने॒ । ओज॑से । गृ॒णन्ति॑ । दे॒व ।

कृ॒ष्टयः॑ ॥ अ॒मैः॑ । 62 (50)

TS 2.6.11.3

–र॒मि॒त्रम॑र्दय ॥

कु॒वि॒त्सु॒नो ग॒वि॒ष्टये॑ऽग्ने॒ सँ॒वेषि॑षो र॒यिं ।

उ॒रु॒कृ॒दु॒रु ण॑स्कृ॒धि ॥

मा नो॑ अ॒स्मिन् महा॑धने॒ परा॑ व॒ग्भारि॑भृ॒द्यथा॑ ।

सँ॒वर्गं॑ सँ॒ र॒यिं ज॑य ॥

अ॒न्यम॑स्म॒द्भिया॑ इ॒यम॑ग्ने॒ सिष॑क्तु दु॒च्छु॒ना ॥

व॒र्धा नो॑ अ॒मव॑च्छ॒वः ॥

यस्या॑जु॒षन्न॑म॒स्विनः॑ श॒मीम॑दु॒र्मख॑स्य॒वा ।

तं घे॒दग्नि॑र्वृ॒धाऽव॑ति ॥

पर॑स्या॒ अधि॑ – [] 63

TS 2.6.11.3 - Padam

अ॒मि॒त्रम् । अ॒र्दय॑ ॥ कु॒वि॒त् । स्वि॑ति । नः॑ । ग॒वि॒ष्टय॑ इति गो–इ॒ष्टये॑ ।

अ॒ग्ने॒ । सँ॒वेषि॑ष इति सं – वे॒षिषः॑ । र॒यिम् ॥ उ॒रु॒कृ॒दि॒त्युरु॑–कृ॒त् ।

उ॒रु । नः ॥ कृ॒धि । मा । नः । अ॒स्मिन् । म॒हा॒ध॒न इति॑ म॒हा-ध॒ने ।
 प॒रेति॑ । व॒र्क् । भा॒रभृ॑दिति॑ भा॒र – भृ॒त् । य॒था ॥ सँव॑र्गमि॒ति
 सं – वर्ग॑म् । स॒मि॒ति । र॒यिम् । ज॒य ॥ अ॒न्यम् । अ॒स्मत् । भि॒यै ।
 इ॒यम् । अ॒ग्ने॑ । सि॒ष॒क्तु । दु॒च्छु॒ना ॥ व॒र्ध॑ । नः ।
 अ॒म॒व॒दि॒त्य॒म-व॑त् । श॒वः ॥ य॒स्य॑ । अ॒जु॒षत् । न॒म॒स्वि॒नः । श॒मी॑म् ।
 अ॒दु॒र्म॒ख॒स्ये॒त्य॒दुः-म॒ख॒स्य॑ । वा ॥ तम् । घ॒ । इ॒त् । अ॒ग्निः । वृ॒धा ।
 अ॒व॒ति ॥ प॒र॒स्याः । अ॒धी॒ति । 63 (50)

TS 2.6.11.4

सँव॑तोऽव॒रा॒ अ॒भ्या॑ तर ।
 य॒त्रा॒ह॒म॒स्मि॒ ता॒ अव॑ ॥
 वि॒द्वा हि ते॑ पु॒रा व॒य॒म॒ग्ने॑ पि॒तु॒र्य॒था॒व॒सः॑ ।
 अ॒धा ते॑ सु॒म्न॒मी॒महे॑ ॥
 य॒ उ॒ग्र इ॒व श॒र्य॒हा ति॒ग्म॒शृ॒ङ्गो॒ न व॑स॒गः॑ ।
 अ॒ग्ने पु॒रो रु॒रो॒जि॒थ ॥
 स॒खा॒यः सं॑ वः॒ सं य॑ञ्च॒मि॒ष॒ स्तो॒मं चा॒ग्नये॑ ॥

वर्षि॑ष्ठाय॒ क्षि॒तीना॒मूर्जो॑ न॒प्त्रे स॒ह॒स्व॒ते ॥

स॒ꣳस॒मि॒द्यु॒व॒से वृ॒ष॒न्त्र () – अ॒ग्ने वि॒श्वा॒न्य॒र्य आ ।

इ॒ड॒स्प॒दे स॒मि॒द्ध्य॒से स नो॑ व॒सू॒न्या भ॑र ॥

प्र॒जा॒प॒ते स वे॒द सो॒मा पू॒ष॒णे मौ दे॒वौ ॥ 64

TS 2.6.11.4 - Padam

सँ॒व॒त इति॑ सं॒-व॒तः । अ॒व॒रा॒न् । अ॒भि । ए॒ति । त॒र ॥ य॒त्र । अ॒ह॒म् ।

अ॒स्मि । तान् । अ॒व ॥ वि॒द्म । हि । ते । पु॒रा । व॒य॒म् । अ॒ग्ने ।

पि॒तुः । य॒था । अ॒व॒सः ॥ अ॒ध । ते । सु॒म्न॒म् । ई॒म॒हे ॥ यः । उ॒ग्रः ।

इ॒व । श॒र्य॒हेति॑ श॒र्य – हा । ति॒ग्म॒शृ॒ङ्ग इति॑ ति॒ग्म – शृ॒ङ्गः । न ।

व॒ꣳस॒गः ॥ अ॒ग्ने । पु॒रः । रु॒रो॒जि॒थ ॥ स॒खा॒यः । स॒मि॒ति । वः ।

स॒म्य॒ञ्च॒म् । इ॒ष॒म् । स्तो॒म॒म् । च । अ॒ग्न॒यै ॥ व॒र्षि॑ष्ठाय ।

क्षि॒ती॒ना॒म् । ऊ॒र्जः । न॒प्त्रे । स॒ह॒स्व॒ते ॥ स॒ꣳस॒मि॒ति सं॒-स॒म् । इत् ।

यु॒व॒से । वृ॒ष॒न्त्र () । अ॒ग्ने । वि॒श्वा॒नि । अ॒र्यः । आ ॥ इ॒डः । प॒दे ।

स॒मि॒ति । इ॒द्ध्य॒से । सः । नः । व॒सू॒नि । ए॒ति । भ॑र ॥

प्र॒जा॒प॒त॒ इति॑ प्र॒जा॒ – प॒ते॒ । सः॑ । वे॒द॒ ।

सो॒मा॒पू॒ष॒णेति॑ सो॒मा॒ – पू॒ष॒णा॒ । इ॒मौ॑ । दे॒वौ॑ ॥ 64 (69)

(य॒ज्ञ॒ – म॒मै॒ – र॒धि॑ – वृ॒ष॒ – त्रैका॒न्न॒ वि॒श॒तिश्च॑) (A11)

TS 2.6.12.1

उ॒श॒न्त॒स्त्वा॒ ह॒वा॒म॒ह॒ उ॒श॒न्तः॑ स॒मि॒धी॒म॒हि॒ ।

उ॒श॒न्नु॒श॒त॒ आ॒ व॒ह॒ पि॒तृ॒न् ह॒वि॒षे॑ अ॒त्त॒वे॑ ॥

त्व॒ञ् सो॒म॒ प्र॒चि॒कितो॑ म॒नी॒षा॒ त्व॒ञ् र॒जि॒ष्ठ॒म॒नु॒ ने॒षि॒ प॒न्थां॑ ।

तव॑ प्र॒णी॒ती॒ पि॒त॒रो॑ न॒ इ॒न्दो॑ दे॒वेषु॑ र॒त्न॒म॒ भ॒ज॒न्त॒ धी॒राः॑ ॥

त्वया॑ हि नः॑ पि॒त॒रः॑ सो॒म॒ पूर्वे॑ क॒र्मा॒णि च॒क्रुः॑ प॒व॒मा॒न॒ धी॒राः॑ ।

व॒न्व॒न्न॒वा॒तः॑ प॒रि॒धी॒ञ् र॒पो॒र्णु॑ वी॒रे॒भि॒र॒श्चै॒र्म॒घ॒वा॑ भ॒वा – [] 65

TS 2.6.12.1 - Padam

उ॒श॒न्तः॑ । त्वा॒ । ह॒वा॒म॒हे॒ । उ॒श॒न्तः॑ । स॒मि॒ति॑ । इ॒धी॒म॒हि॒ ॥ उ॒श॒न् ।

उ॒श॒तः॑ । ए॒ति॑ । व॒ह॒ । पि॒तृ॒न् । ह॒वि॒षे॑ । अ॒त्त॒वे॑ ॥ त्व॒म् । सो॒म॒ ।

प्र॒चि॒कित॑ इति॑ प्र – चि॒कितः॑ । म॒नी॒षा॒ । त्व॒म् । र॒जि॒ष्ठ॒म् । अ॒न्वि॒ति॑ ।

ने॒षि॒ । प॒न्था॒म् ॥ तव॑ । प्र॒णी॒ती॒ति॒ प्र – नी॒ती॒ । पि॒त॒रः॑ । नः॑ ।

इ॒न्दो॑ इति॑ । दे॒वेषु॑ । र॒त्न॒म् । अ॒भ॒ज॒न्त॒ । धी॒राः॑ ॥ त्वया॑ । हि॒ । नः॑ ।

पि॒तरः । सो॒म । पूर्वे॑ । कर्मा॑णि । च॒क्रुः । प॒व॒मा॒न । धी॒राः ॥
व॒न्वन् । अ॒वा॒तः । परि॑धी॒निति॑ परि – धीन् । अ॒पे॒ति । ऊ॒र्णु ।
वी॒रेभिः॑ । अ॒श्वैः । म॒घवे॑ति म॒घ – वा । भ॒व । 65 (50)

TS 2.6.12.2

नः ॥

त्व॑ सो॒म पि॒तृभिः॑ सँ॒वि॒दा॒नोऽनु॑ द्या॒वापृ॑थि॒वी आ त॑तन्थ ।
तस्मै॑ त इ॒न्द्रो ह॒विषा॑ वि॒धेम व॒यं स्या॑म प॒तयो॑ र॒यीणां॑ ॥
अ॒ग्नि॒ष्वात्ताः॑ पि॒तर ए॒ह ग॑च्छ॒त स॒दःस॒दः स॒दत॑ सु॒प्रणी॑तयः ।
अ॒त्ता ह॒वीषि॑ प्र॒यत॑तानि ब॒र्हिष्य॑था र॒यिर्वी॑रं दधा॒तन ॥
ब॒र्हिष॑दः पि॒तर ऊ॒त्यर्वा॑गि॒मा वो ह॒व्या च॑कृ॒मा जु॒षद्ध्वं॑ ॥
त आ ग॒ताऽव॑सा श॒न्तमे॑नाथास्मभ्य॑ – [] 66

TS 2.6.12.2 - Padam

नः ॥ त्वम् । सो॒म । पि॒तृभि॒रिति॑ पि॒तृ – भिः । सँ॒वि॒दा॒न इति॑
सं – वि॒दा॒नः । अ॒न्विति॑ । द्या॒वापृ॑थि॒वी इति॑ द्या॒वा-पृ॑थि॒वी । एति॑ ।
त॒तन्थ॑ ॥ तस्मै॑ । ते । इ॒न्द्रो इति॑ । ह॒विषा॑ । वि॒धेम । व॒यम् । स्या॑म ।
प॒तयः॑ । र॒यीणा॑म् ॥ अ॒ग्नि॒ष्वात्ता॑ इत्य॒ग्नि-स्वा॑त्ताः । पि॒तरः । एति॑ ।

इ॒ह । ग॒च्छ॒त । स॒दः स॒द इति॑ स॒दः – स॒दः । स॒द॒त । सु॒प्र॒णी॒त॒य
इति॑ सु – प्र॒णी॒त॒यः ॥ अ॒त्त । ह॒वी॒षि॑ । प्र॒य॒ता॒नी॒ति प्र – य॒ता॒नि ।
ब॒र्हि॒षि । अ॒थ । र॒यि॒म् । स॒र्व॒वी॒र॒मि॒ति स॒र्व – वी॒र॒म् । द॒धा॒त॒न ॥
ब॒र्हि॒ष॒द इति॑ ब॒र्हि – स॒दः । पि॒तरः॑ । ऊ॒ती । अ॒र्वाक् । इ॒मा ।
वः । ह॒व्या । च॒कृ॒म । जु॒ष॒ध्व॒म् ॥ ते । ए॒ति । ग॒त । अ॒व॒सा ।
श॒न्त॒मे॒ने॒ति शं – त॒मे॒न । अ॒थ । अ॒स्म॒भ्य॒मि॒त्य॒स्म – भ्य॒म् । 66 (50)

TS 2.6.12.3

शं यो॒र॒र॒पो द॒धा॒त ॥

आऽहं॑ पि॒तृ॒न्थ् सु॒वि॒द॒त्रा॒ अ॒वि॒त्थि॑ न॒पा॒तं च वि॒क्र॒म॒णं च वि॒ष्णोः॑ ।
ब॒र्हि॒ष॒दो ये स्व॒ध॒या सु॒त॒स्य॑ भ॒ज॒न्त पि॒त्व॒स्त इ॒हाऽऽ ग॒मि॒ष्ठाः ॥
उ॒प॒हू॒ताः पि॒तरः॑ सो॒म्या॒सो ब॒र्हि॒ष्येषु॑ नि॒धिषु॑ प्रि॒येषु॑ ।
त आ ग॒म॒न्तु॒ त इ॒ह श्रु॒व॒न्त्व॒धि ब्रु॒व॒न्तु॒ ते अ॒व॒न्त्व॒स्मा॒न् ॥
उ॒दी॒र॒ता॒म॒व॒र उ॒त् प॒रा॒स उ॒न्म॒द्ध्य॒माः पि॒तरः॑ सो॒म्या॒सः ।

अ॒सुं – [] 67

TS 2.6.12.3 - Padam

शम् । योः । अ॒रपः । द॒धा॒त ॥ ए॒ति । अ॒हम् । पि॒तृन् । सु॒वि॒द॒त्रा॒नि॒ति॑
सु – वि॒द॒त्रान् । अ॒वि॒त्सि॒ । न॒पा॒तम् । च । वि॒क्र॒म॒ण॒मि॒ति॑
वि – क्र॒म॒णम् । च । वि॒ष्णोः ॥ ब॒र्हि॒षद॒ इति॑ ब॒र्हि – स॒दः ।
ये । स्व॒ध॒ये॒ति॑ स्व – ध॒या । सु॒त॒स्य॑ । भ॒ज॒न्त । पि॒त्वः । ते । इ॒ह ।
आ॒ग॒मि॒ष्ठा इ॒त्या – ग॒मि॒ष्ठाः ॥ उ॒प॒हू॒ता इ॒त्यु॒प – हू॒ताः । पि॒तरः ।
सो॒म्या॒सः । ब॒र्हि॒ष्येषु॑ । नि॒धि॒ष्वि॒ति॑ नि॒धिषु॑ । प्रि॒येषु॑ ॥ ते । ए॒ति ।
ग॒म॒न्तु । ते । इ॒ह । श्रु॒व॒न्तु । अ॒धी॒ति॑ । ब्रु॒व॒न्तु । ते । अ॒व॒न्तु ।
अ॒स्मा॒न् ॥ उ॒दि॒ति॑ । ई॒र॒ता॒म् । अ॒व॒रे । उ॒दि॒ति॑ । प॒रा॒सः । उ॒दि॒ति॑ ।
म॒द्ध्य॒माः । पि॒तरः । सो॒म्या॒सः ॥ अ॒सु॒म् । 67 (50)

TS 2.6.12.4

य॑ ई॒युर॑ वृ॒का ऋ॒त॒ज्ञा॒स्ते नो॑ऽव॒न्तु॑ पि॒त॒रो ह॒वेषु॑ ॥
इ॒दं पि॒तृ॒भ्यो न॒मो अ॒स्त्व॒द्य ये पू॒र्वा॒सो य उ॒प॒रा॒स ई॒युः ।
ये पा॒र्थि॒वे र॒ज॒स्या नि॒ष॒त्ता ये वा नू॒न् सु॒वृ॒ज॒ना॒सु वि॒क्षु ॥
अ॒धा य॒था नः॑ पि॒तरः॑ प॒रा॒सः प्र॒त्ना॒सो अ॒ग्न ऋ॒त॒मा॒शु॒षा॒णाः ।

शु॒चीद॒यन् दी॒धिति॑ मु॒क्थशा॒सः क्षा॒मा भि॒न्दन्तो अ॒रुणी॑रप॒ व्रन् ॥

यद॒ग्ने – [] 68

TS 2.6.12.4 - Padam

ये । ई॒युः । अ॒वृ॒काः । ऋ॒त॒ज्ञा इत्यृ॑त – ज्ञाः । ते । नः । अ॒वन्तु॑ ।
पि॒तरः॑ । ह॒वेषु॑ ॥ इ॒दम् । पि॒तृ॒भ्य इति॑ पि॒तृ – भ्यः॑ । नमः॑ ।
अ॒स्तु । अ॒द्य । ये । पूर्वा॑सः । ये । उप॑रासः । ई॒युः ॥ ये । पा॒र्थि॒वे ।
रज॑सि । ए॒ति । निष॑त्ता इति॑ नि – स॒त्ताः । ये । वा । नू॒नम् ।
सु॒वृ॒जना॒स्विति॑ सु॒-वृ॒जना॑सु । वि॒क्षु ॥ अध॑ । यथा॑ । नः । पि॒तरः॑ ।
परा॑सः । प्र॒त्नासः॑ । अ॒ग्ने । ऋ॒तम् । आ॒शु॒षा॒णाः ॥ शु॒चि । इत् ।
अ॒यन् । दी॒धिति॑म् । उ॒क्थशा॒स इत्यु॑क्थ – शा॒सः । क्षा॒म ।
भि॒न्दन्तः॑ । अ॒रुणीः॑ । अपे॑ति । व्रन् ॥ यत् । अ॒ग्ने । 68 (50)

TS 2.6.12.5

क॒व्यवा॑हन पि॒तृन् यक्ष्य॑तावृ॒धः ।
प्र च॑ ह॒व्यानि॑ वक्ष्य॑सि दे॒वेभ्य॑श्च पि॒तृ॒भ्य आ ॥
त्वम॑ग्न ई॒डितो॑ जा॒तवे॒दोऽवा॑ङ्ढ॒व्यानि॑ सु॒रभी॑णि कृ॒त्वा ।
प्रा॒दाः पि॒तृ॒भ्यः स्व॒धया॑ ते अ॒क्षन्न॒द्धि त्वं दे॒व प्र॑यता ह॒वी॒षि ॥

मा॒तली॑ क॒व्यैर्य॑मो अ॒ङ्गि॒रो॒भि॒र्बृ॒ह॒स्पति॑र्. ऋ॒क्व॒भि॒र्वावृ॑धानः ।
या॒ञ्च॑ दे॒वा वावृ॑धुर्ये च दे॒वान्थ् स्वाहा॑ऽन्ये स्व॒धया॑ऽन्ये म॒दन्ति॑ ॥ 69

TS 2.6.12.5 - Padam

क॒व्य॒वा॒ह॒ने॒ति॑ क॒व्य – वा॒ह॒न । पि॒तृन् । यक्षि॑ । ऋ॒ता॒वृ॒ध
इ॒त्यृ॒त – वृ॒धः ॥ प्रे॒ति । च । ह॒व्यानि॑ । व॒क्ष्य॒सि । दे॒वेभ्यः॑ । च ।
पि॒तृभ्य॑ इति पि॒तृ – भ्यः । आ ॥ त्वम् । अ॒ग्ने । ई॒डि॒तः । जा॒तवे॑द
इति॑ जा॒त – वे॒दः । अ॒वाट् । ह॒व्यानि॑ । सु॒रभी॑णि । कृ॒त्वा ॥
प्रे॒ति । अ॒दाः । पि॒तृभ्य॑ इति पि॒तृ – भ्यः । स्व॒धये॑ति स्व – धया॑ ॥
ते । अ॒क्षन् । अ॒द्धि । त्वम् । दे॒व । प्र॒य॒ते॒ति॒ प्र – य॒ता ।
ह॒वी॒ष्णि॑ ॥ मा॒तली॑ । क॒व्यैः । य॒मः । अ॒ङ्गि॒रो॒भिरि॒त्यङ्गि॑रः – भिः ।
बृ॒ह॒स्पतिः॑ । ऋ॒क्व॒भि॒रि॒त्यृक्व॑-भिः । वा॒वृ॒धा॒नः ॥ या॒न् । च । दे॒वाः ।
वा॒वृ॒धुः । ये । च । दे॒वान् । स्वाहा॑ ॥ अ॒न्ये । स्व॒धये॑ति स्व-धया॑ ॥
अ॒न्ये । म॒दन्ति॑ ॥ 69 (50)

TS 2.6.12.6

इ॒मं य॑म प्र॒स्तर॑माहि सी॒दाङ्गि॑रोभिः पि॒तृभिः॑ सँ॒वि॒दा॒नः ।
आ॒त्वा म॒न्त्राः॑ क॒वि॒श॒स्ता व॒ह॒न्त्वे॒ना रा॒जन् ह॒विषा॑ मा॒दय॑स्व ॥

अङ्गि॑रोभि॒रा ग॒हि य॒ज्ञिये॑भि॒र्यम॑ वैरू॒पैरि॒ह मा॑दयस्व ।
 वि॒वस्व॑न्त॒ हुवे॑ यः पि॒ता तेऽस्मि॑न् य॒ज्ञे ब॒र्हिष्या॑ नि॒षद्य॑ ॥
 अङ्गि॑रसो नः पि॒तरो॑ नव॒ग्वा अथ॑र्वा॒णो भृ॑गवः सो॒म्यासः॑ ।
 तेषां॑ व॒यम् सु॑म॒तौ य॒ज्ञिया॑नामपि भ॒द्रे सौ॑म॒नसे॑ () स्या॑म ॥ 70

TS 2.6.12.6 - Padam

इ॒मम् । य॒म । प्र॒स्तर॑मिति प्र – स्त॒रम् । ए॒ति । हि॒ । सी॒द ।
 अङ्गि॑रोभि॒रित्यङ्गि॑रः – भिः । पि॒तृभि॑रिति पि॒तृ – भिः ।
 सँ॒वि॒दा॒न इति॑ सं – वि॒दा॒नः ॥ ए॒ति । त्वा॒ । मन्त्राः॑ ।
 क॒वि॒श॒स्ता इति॑ क॒वि – श॒स्ताः । व॒हन्तु॑ । ए॒ना । रा॒ज॒न् । ह॒विषा॑ ।
 मा॒द॒य॒स्व ॥ अङ्गि॑रोभि॒रित्यङ्गि॑रः – भिः । ए॒ति । ग॒हि । य॒ज्ञिये॑भिः ।
 य॒म । वैरू॒पैः । इ॒ह । मा॒द॒य॒स्व ॥ वि॒वस्व॑न्तम् । हु॒वे । यः । पि॒ता ।
 ते । अ॒स्मिन् । य॒ज्ञे । ब॒र्हिषि॑ । ए॒ति । नि॒षद्येति॑ नि – सद्य॑ ॥
 अङ्गि॑रसः । नः । पि॒तरः॑ । नव॒ग्वाः । अथ॑र्वा॒णः । भृ॑गवः ।
 सो॒म्यासः॑ ॥ तेषां॑ व॒यम् । सु॑म॒तावि॑ति सु – म॒तौ । य॒ज्ञिया॑नाम् ।
 अ॒पीति॑ । भ॒द्रे । सौ॑म॒नसे॑ () । स्या॑म ॥ 70 (51)

पद पाठे (वाक्य सहित) – द्वितीयकाण्डे – षष्ठः प्रश्नः

(भ॒वा – स्म॒भ्य – म॒सुं – यँ॑द॒ग्ने – म॒द॒न्ति – सौ॒म॒न॒स –
ए॒कं॑ च) (A12)

Prasna Korvai with starting Padams of 1 to 12 Anuvaakams :-

(स॒मि॒ध – श्र॒क्षु॒षी – प्र॒जा॒प॒ति॒रा॒ज्यं – दे॒व॒स्य॒ स्म्यं – ब्र॒ह्म॒वा॒दि॒नो
ऽद्भि – र॒ग्ने॒स्त्रयो – म॒नुः पृ॒थि॒व्याः – प॒श॒वो – ऽग्नी॑धे – दे॒वा वै
य॒ज्ञ॒स्य – यु॒क्ष्वो – श॒न्त॒स्त्वा – द्वा॒द॒श)

Korvai with starting Padams of 1, 11, 21 Series of Panchaatis :-

(स॒मि॒धो – या॒ज्या – त॒स्मान्न॒भा॒गꣳ – हि त॒म॒न्वि – त्या॒ह
प्र॒जा वा – आ॒हे॒त्या॒ह – यु॒क्ष्वा हि – स॒प्त॒तिः)

First and Last Padam of Sixth Prasnam of Kandam 2 :-

(स॒मि॒धः – सौ॒म॒न॒से स्या॒म)

पद पाठे (वाक्य सहित) – द्वितीयकाण्डे – षष्ठः प्रश्नः

Kanda Korvai with starting Padams of Six Prasnas of Kandam 2 :-

(वा॒य॒व्यं – प्र॒जा॒प॒ति – रा॒दि॒त्ये॒भ्यो – दे॒वा – वि॒श्वरू॒पः –
स॒मि॒धः – षट्)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे द्वितीयकाण्डे षष्ठः प्रश्नः

समाप्तः ॥

॥ इति द्वितीयं काण्डं ॥

पद पाठे (वाक्य सहित) – द्वितीयकाण्डे – षष्ठः प्रश्नः

Details of Panchati and Padam for KANDAM 2 , Prasanam 6 (TS 2.6)

	Panchati	Padams
Anuvakam 1	7	335
Anuvakam 2	6	302
Anuvakam 3	6	282
Anuvakam 4	4	183
Anuvakam 5	6	317
Anuvakam 6	6	287
Anuvakam 7	6	284
Anuvakam 8	7	344
Anuvakam 9	8	396
Anuvakam 10	4	183
Anuvakam 11	4	219
Anuvakam 12	6	301
Total →	70	3433

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in